

摘藻堂四庫全書薈要

經部

欽定四庫全書薈要卷一千六百三十六

經部

春秋諸傳會通卷十一

元李廉撰

僖公

二十有七年春杞子來朝左氏

曰杞桓公來朝用夷禮故

注杞先代之後而迫於東夷風俗雜壞言語制度有

時而變故杞子卒傳所以貶也今稱朝者始於朝禮

終而不全異於介公羊疏杞本公爵但春秋欲新周

葛盧唯貶其爵故宋而黜之稱伯莊二十七

年杞伯來朝是也二十三年杞子卒者以微弱為徐

莒所脅不能死位故以其一等貶之見聖人子孫有

誅無絕而已至此復稱子者起其無禮不備故魯入之也

案杞子說具見前

夏六月庚寅齊侯昭卒秋八月乙未葬齊孝公左氏齊有

怨不廢喪紀禮也

乙巳公子遂帥師入杞

乙巳九月六日

左氏

責無禮也

公羊

注杞屬脩禮朝

魯雖無禮君子躬自厚而薄責於人不當入之故書日責之

張氏

人方來朝而帥師入之以怨報

德此所謂欲加之罪何患無辭者也

冬楚人陳侯蔡侯鄭伯許男圍宋左氏

楚子將圍宋使子文治兵於睢

子玉治兵於蔿，蔿不能以入矣。冬，楚子及諸侯圍宋。宋公過三，三百乘其不能以入矣。冬，楚子及諸侯圍宋。宋公孫固如晉告急。先軫曰：「報施救患，取威定霸，於是乎在矣。」狐偃曰：「楚始得曹而新昏於衛，若伐曹衛，楚必救之。」則齊宋免矣。晉侯始入而教其民，二年欲用之。子犯曰：「民未知義，未安其居。」於是乎出定襄王，入務利。民子犯曰：「民未知信，未宣其用。」於是乎伐原以示之信。民易資者，不求豐焉，明徵其辭。子犯曰：「民未知禮，未生其共。」於是乎大蒐以示之禮，作執秩以正其官。民聽不惑，而後用之。出穀戍，釋宋圍。一戰而霸，文之教也。注：楚序諸侯之上，主兵公羊。此楚子也。其稱故稱人恥，不得志以徵者，告公羊。人何恥曷為？恥為終僖之篇，貶也。穀梁：楚人者，楚子也。其曰人何也？人何也？不正其信夷狄而伐中國也。

十有二月甲戌公會諸侯盟于宋左氏

注諸侯伐宋公與楚有好而往

會之非後期宋方見圍無胡氏楚稱人貶也宋公先

嫵於與盟故直以宋地

胡氏楚稱人貶也宋公先

有篡弑之惡楚人無故搜諸侯以圍之何名也故黜

而稱人以著其罪諸侯信夷狄伐中國獨無貶乎人

楚子所以人諸侯也公與楚結好故往會盟其地陳

以宋者宋方見圍無嫌於與盟而公之罪亦著矣陳

氏楚嘗有君矣此楚子也則其稱人何嫌子楚以伯

也盟于齊楚猶序陳蔡之下于鹿上猶不先齊宋

也孟之會宋楚始並為諸侯長矣楚之稱子而長於

諸侯宋襄公為之也魯僖衛文夫子之刪詩有取焉

桓公卒而衛從楚魯又從楚楚敗宋于泓納頓子滅

夔取齊之穀且合四國之君以圍宋春秋以是為夷

狄之強而已矣雖序於諸侯之上而特人之不稱人則疑於莊王

案圍宋之楚人正義曰傳云楚子及諸侯圍宋則是楚子親自來也十二月公會諸侯盟于宋公為楚子在宋而往會之明楚子與盟也明年楚子入居于申使子玉去宋由此而言楚子初來圍宋必親至宋國使子玉主兵明年見晉之盛身始去之獨留子玉於宋耳此說據經為合但不敢言杜氏之非不以稱人為貶而遷就於告詞之說為謬耳公穀注又以地宋謂公已為和解故宋亦與盟此亦不察夫事實也○又案晉文晉悼之興皆以救宋却楚成功晉人有言曰成伯安彊自宋始矣大抵宋亦中國之樞紐也故始焉楚成爭伯而有宋之圍繼焉楚莊偏伯而又有宋之圍始焉楚爭伯而有宋之盟終焉楚分伯而亦有宋之盟

附錄左氏

是年晉蒐于被廬作三軍謀元帥以郤穀將中軍穀卒原軫將中軍

二十有八年春晉侯侵曹晉侯伐衛左氏

晉侯將伐曹假道于衛衛

人弗許還自南河濟侵曹伐衛正月公羊

曷為再言晉侯非兩

之也然則何以不言遂未侵曹也未侵曹則其言侵曹何致其意也其意侵曹則曷為伐衛晉侯將侵曹

假塗于衛衛曰不可得則固將伐之也注曹有罪晉文行伯征之衛壅遏不得使義兵以時進故著言侵

曹以致其意所以通賢穀梁再稱晉侯忌也注曹衛者之心不使壅塞也

念舊惡故再稱胡氏再稱晉侯譏復怨也春秋之時晉侯以刺之胡氏用兵者非懷私復怨則利人土

地爾詩云百爾君子不知德行不忤不求何用不臧不忤則能懲忿不求則能窒欲然後貪憤之兵亡矣

或曰曹衛服事楚人於是乎致武奚為不可曰楚人接諸侯以圍宋陳蔡鄭許舉兵而同會魯公與會而

同盟楚雖得曹新昏於衛然其君不在會其師不與
圍以方諸國不猶愈乎又况衛已請盟而晉人弗之
許也書曰必有忍其乃有濟有容德乃大文公能忍
於奄豎里鳧須矣何獨不能忍於曹衛乎再稱晉侯
甚之也下書楚人救衛則譏晉深矣春秋責備賢者
而樂與人改過責備賢者故再稱晉侯樂與人改過
故衛已請盟不當拒而絕之也

附錄

左氏晉侯事

左氏

寺人披請見晉侯辭焉曰夫祛

入也其知之矣君命無二古之制也除君之惡唯
力是視蒲人狄人余何有焉齊桓公置射鉤而使
管仲相君若易之何辱命焉公見之晉侯之豎頭
須守藏者也其出也竊藏以逃盡用以求納之及
入求見公辭焉以沐謂僕人曰沐則心覆心覆則
圖反宜吾不得見也國君而讎匹夫懼者甚衆矣

公遽見之晉侯賞從亡者介之推不言祿祿亦弗及推曰獻公之子九人惟君在矣天實置之而二子以為己力乎遂隱而死晉侯以緡上為之田曰以志吾過且旌善人

公子買戍衛不卒戍刺之楚人救衛左氏

晉侯齊侯盟于斂孟衛侯

請盟晉人弗許衛侯欲與楚國人不欲故出其君以說於晉衛侯出居于襄牛公子買戍衛楚人救衛不克公懼於晉殺子叢以說焉謂楚公羊內諱殺大夫人曰不卒戍也注子叢即買也謂之刺之也

胡氏內殺大夫稱刺者若曰刺審其情與衆棄之而專殺之罪則一耳周官有三刺一刺曰訊羣臣

再刺曰訊羣吏三刺曰訊萬民刺未有書其故者而

以不卒戍刺之則知買為無罪矣夫殺無罪之士將

以苟說於強國於是乎不君張氏春秋予楚以恤患矣故特書其故以貶之也

案刺公子買之事左氏得之公穀不知事實皆以為殺有罪之詞非也○又案魯刺大夫二買及公子偃○又案春秋予楚以救正猶書宋人伐陳衛人救陳書成鄭虎牢楚公子負救鄭相似蓋彼本無能救之善但春秋簡以深著伐者之罪耳

三月丙午晉侯入曹執曹伯畀宋人左氏晉侯圍曹門

尸諸城上晉侯患之聽輿人之謀曰稱舍於墓師遷焉曹人兇懼為其所得者棺而出之因其兇而攻之入曹數之以不用僖負羈而乘軒者三百人也令無入僖負羈之宮而免其族報施也魏犢顛頡藝僖負

羈氏殺顛頡徇于師宋人如晉告急先軫曰使宋舍
我而貽齊秦藉之告楚我執曹君而分曹衛之田以
賜宋人楚愛曹衛必不許也喜賂怒頑能無戰乎公
說執曹伯分曹衛之田以畀宋人注所謂譎而不正
穀梁曹伯惡晉侯也畀與也其曰人何也晉侯而斥執
畀宋公也注畀上與下胡氏典古者覲文匿武脩其訓
之辭故不以侯畀公胡氏典序成而不至於是乎
有攻伐之兵故孟子謂萬章曰子以為有王者作將
比今之諸侯而誅之乎其教之不改而後誅之乎曹
伯羸者未狎晉政莫知所承晉文不脩辭令遽入其
國既執其君又分其田暴矣欲致楚師與之戰而以
曹伯畀宋人譎矣雖一戰勝楚遂主夏盟舉動不中
於禮亦多矣徒亂人上下之分無君臣之禮其功雖
多道不張氏自晉侯侵曹至此皆春秋
足尚也張氏著文公致楚與戰之由也

案執曹伯書晉侯穀梁正例以稱侯以執者執
無罪也於此條雖合而於厲公執負芻之例不
通矣胡氏正例以稱侯以執伯討也於執負芻
雖合而於此條又不通矣公羊拘於稱侯為伯
討之例故以此為義兵其說曰畀者何與也其
言畀者何與使聽之也曹伯之罪何甚惡也其
惡奈何不可以一罪言也注者曰畀宋者時天
王居鄭晉文以宋王者之後法度所存假使治
其獄其謬如此此不知事實之失也然則云何
陸氏曰不稱晉人執者承上晉侯入曹故不重
言晉人也此與楚子伐吳執齊慶封同例耳胡
氏無傳想同此說○又案晉執曹伯畀宋與執
戎蠻子歸歸楚同此書畀而彼書歸歸蓋畀者猶此
與彼之辭歸歸者以京師之禮待楚矣○又案書
法獻者下奉上也錫者上賜下也畀者非
上非下者也三者據尊卑言之趙子說是

夏四月己巳晉侯齊師宋師秦師及楚人戰于城濮楚

師敗績左氏

曰楚子入居于申使申叔去穀使子玉去宋

晉國險阻難難脩嘗之矣民之情偽盡知之矣天假
之年而除其害天之所置其可廢乎軍志曰允當則
歸又曰知難而退又曰有德不可敵此三志者晉之
謂矣子玉使伯欒請戰曰非敢必有功也願以間執
讒慝之口王怒少與之師惟西廣東宮與若敖之六
卒實從之子玉使宛春告於晉曰請復衛侯而封曹
臣亦釋宋之圍子犯曰子玉無禮哉君取一臣取二
不可失矣先軫曰定人之謂禮楚一言而定三國我
一言而亡之我則無禮何以戰乎不許楚言是棄宋
也救而棄之謂諸侯何不如私許復曹衛以攜之執
宛春以怒楚既戰而後圖之公說乃拘宛春於衛且
私許復曹衛曹衛告絕於楚子玉怒從晉師晉師退

軍吏曰以君辟臣辱也子犯曰微楚之惠不及此退
三舍辟之所以報也我退而楚還我將何求若其不
還君退臣犯曲在彼矣退三舍楚衆欲止子玉不可
夏四月戊辰晉侯宋公齊國歸父崔天秦小子憖次
于城濮聽與人之誦曰原田每每舍其舊而新是謀
公疑焉子犯曰戰也戰而捷必得諸侯若其不捷表
裏山河必無害也公曰若楚惠何藥貞子曰漢陽諸
姬楚實盡之思小惠而忘大恥不如戰也子玉使鬬
勃請戰曰請與君之士戲得臣與寓目焉晉侯使藥
枝對曰楚君之惠未之敢忘既不獲命矣敢煩大夫
謂二三子戒爾車乘敬爾君事詰朝將見晉車七百
乘韞鞬執鞞晉侯登有莘之虛以觀師曰少長有禮
其可用也遂伐其木以益其兵已巳晉師陳于莘北
胥臣以下軍之佐當陳蔡子玉以若敖之六卒將中
軍曰今日必無晉矣子西將左子將右胥臣蒙馬
以虎皮先犯陳蔡陳蔡奔楚右師潰狐毛狐偃以工

軍夾攻子西楚左師潰楚師敗績子玉收其卒而止
故不敗晉師三日館穀及癸酉而還注宋公齊國歸
父秦小子慙既次城濮以師屬晉不與戰公羊此大
也子玉及陳蔡之師不書恥敗告文畧也公羊戰也
曷為使微者子玉得臣也其稱人何貶曷為貶大夫
不敵君也注臣無敵君戰之義故絕之也秦稱師者
助伯者征伐有功故褒進之齊桓先朝天子晉胡氏
文先討夷狄者晉文之時楚與爭強所遭遇異
楚稱人貶也戰而言及主乎是戰者也當是時晉師
避楚三舍請戰者得臣也而經之書及何以在晉得
臣雖從晉師然初告於晉曰請復衛侯而封曹臣亦
釋宋之圍是未有必戰之意也及先軫獻謀許曹衛
以攜其黨拘宛春以激其怒而後得臣之意決矣故
楚雖請戰而及在晉侯誅其意也荆楚恃強憑陵諸
夏滅黃而霸主不能恤敗徐于婁林而諸大夫不能
救執中國盟主而在會者不敢與之爭今又成穀逼

齊合兵圍宋戰勝中國威動天下非有城濮之敗則民其被髮左衽矣宜有美詞稱揚其績而春秋所書如此其畧何也仁人明其道不計其功正其義不謀其利文公一戰勝楚遂主夏盟以功利言則高矣語道義則三王之罪人也知此說則曾西不為管仲而仲尼孟子雖老于行而不悔其有以夫陳氏此宋公也何以但稱師尊晉張氏齊桓伐楚雖能致侯也尊晉者予晉以伯也屈完然楚未大創也故次年即滅弦救鄭終桓公之世楚為患而不能制文公欲伯天下以為楚不大創則不足以定伯故決於一戰以為取威定伯之基但其救患之心止在於報施而討罪之念只行於復怨故以晉侯主之誅文公之心也

案城濮之戰左氏已詳但注者於師稱人之說失之胡氏知書及之為罪晉而不知書侯之為

尊晉故必合胡陳二家然後文意方備張氏發
明齊桓晉文之事亦得之若何休直褒晉文則
又過矣大抵召陵雖以來盟于齊而亦有遂伐
之專城濮雖以書侯于晉而先盟及戰之譎此
皆功罪不相掩之
法也餘見於戰下

楚殺其大夫得臣左氏

子玉既敗王使謂之曰大夫若
入其若申息之老何子西孫伯

曰得臣將死二臣止之曰君其將以為戮及連穀而
死晉侯聞之而後喜可知也曰莫余毒也已焉呂臣
實為令尹奉已胡氏可得臣信有罪矣而楚子知其不
而已不在民矣胡氏可得臣不能使之勿敵而少與之
師又以一敗殺之是以師為重而棄其將以與之也
是晉再克而楚再敗也故稱國以殺而不去其官以
仲尼書鄭棄其師與楚殺得臣
之事觀之可為來世之永鑑矣

衛侯出奔楚左氏

衛侯聞楚師敗懼出奔楚遂胡氏諸

失國出奔未有不名者衛侯何以不名著文公之罪

也衛侯失守社稷竄身裔土於文公何罪乎衛之禍

文公為之也初齊盟于斂孟衛侯請盟晉人弗許

是塞其向善之心雖欲自新改轍而其道無由也高

帝一封雍齒而功臣不競世祖燒棄文書而反側悉

安使文公釋怨許衛結盟南向諸侯棄楚而歸晉矣

忿不思難惟怨是圖必使衛侯竄身無所奔于荆蠻

歸于京師兄弟相殘君臣交訟誰之咎也夫心不外

者乃能統大衆智不鑒者乃能處大事文公欲主夏

盟取威定霸而舉動煩擾若不勝任者惟鑒知自私

而心不廣也春秋於衛侯失國出奔不以其罪名

之而重文公之咎蓋端本議刑責備賢者之意

案衛侯出奔不名之說胡氏得之何氏以為晉

文以王事遂之擇立其次無絕衛之心者非也

陸氏以為令叔武攝位而去故不名亦未必然

五月癸丑公會晉侯齊侯宋公蔡侯鄭伯衛子莒子盟

于踐土

踐土鄭地癸丑月十八日必有誤

左氏

晉師至于衡雍作王宮于踐土

鄭伯使子人九行成于晉晉欒枝入盟鄭伯五月丙午晉侯及鄭伯盟于衡雍丁未獻楚俘于王駟介百

乘徒兵千鄭伯傅王用平禮也王享醴命晉侯伯王命尹氏及王子虎內史叔興父策命晉侯為侯伯賜

之太輅之服戎輅之服彤弓一彤矢百玼弓矢千秬鬯一卣虎賁三百人曰王謂叔父敬服王命以綏四

國糾遼王慝晉侯三辭從命曰重耳敢再拜稽首奉揚天子之丕顯休命受策以出出入三覲癸亥王子

虎盟諸侯于王庭要言曰皆獎王室無相害也有渝此盟明神殛之俾隊其師無克祚國及其玄孫無有

老幼君子謂是盟也信謂晉於是役也能以德攻穀
注襄王聞晉戰勝自往勞之王子虎臨盟不同歆穀
梁諱會天王也注實會天王而文不言天王若胡氏
諸侯自共盟然是諱之也所謂譎而不正

踐土之會天王下勞削而不書何也周室東遷所存
者號與祭耳其實不及一小國之諸侯晉文之爵雖
曰侯伯而號令天下幾於改物實行天子之事此春
秋之名實也與其名存實亡猶愈於名實俱亡是故
天王下勞晉侯于踐土則削而不書去其實以全名
所謂君道也父道也晉侯以臣召君則書天王狩于
河陽正其名以統實所謂臣道也子道也而天下之
大倫尚存而不滅矣衛侯奔楚不書名者未絕其位
也叔武受盟而稱衛子者立以為君也此見聖人陳
深罪晉文報怨行私專權自恣廢置諸侯之意陳
氏序晉侯於齊侯宋公張氏文公於勝楚之後帥諸
侯朝天子然後受侯伯

錫命之策合於易之在師中吉而當三錫之命以懷服萬邦者然負震主之威致天王之屈尊失正位居體之道故即其可書者記之而天王下勞沒而不書以示天下之大訓也

案踐土于溫之書法胡氏論之詳矣外以諱為善則諱晉者非貶也朱子亦曰如葵丘之會召陵之師踐土之盟自是好本末自別

陳侯如會左氏

注陳本與楚楚敗懼而屬公羊其言如晉來不及盟故曰如會

會穀梁

如會外乎會也於會受命也注外乎會不及序也受命于會故書如會

案經書如會三雞澤袁僑于鄒鄭伯

公朝于王所左氏

注王在踐土非公羊曷為不言公如京師故曰王所公羊京師天子在是

也天子在是則曷為不言天子在是不與致天子也
注時晉文公年老恐霸功不成故上白天子曰諸侯
不可卒致願王居踐土下謂諸侯曰天子在是不可
不朝迫使正君臣明王法雖非正起時可與故書朝
因正穀梁朝不言所言所胡氏朝不言所言所非其
其義穀梁者非其所也
外非禮也有虞氏五載一巡守羣后四朝周制十有
二年王乃時巡諸侯各朝于方岳亦何必于京師于
廟然後為禮乎古者天子巡守于四方有常時諸侯
朝于方岳有常所今天王下勞晉侯公朝于王所則
非其時與地矣然則天子在是其可以不以諸侯就朝為
在是而諸侯就朝禮之變也春秋不可以諸侯就朝為
非而以王所非其所陳氏餘也於是晉侯將盟于踐
為賤正其本之意也
土而王即命為方伯諸侯朝焉則先朝而後盟曷為
先書盟後書朝書朝而後盟是以天子與斯盟也書

盟而後朝春秋不以
天子與斯盟之詞也

崇春秋書魯之朝王者三此年二成十三年如
京師是也皆因伯事以行禮然此雖在外而得
書朝彼雖至京師而反書如者蓋此若書如則
無以見天王就朝之實彼若書朝則無以見諸
侯之不咸乎禮義各有在也彼書朝於伐秦之
先此書朝於盟踐土之後者蓋彼不先書朝無
以見朝王之為重此不後書朝無以見諱王之
實義亦各有在也然此書朝猶為下事上之詞
彼書如則不過彼適此之例矣亦微有分別之
又案天王自至之說左氏是公羊不與致王之
說亦好但其注下之言非事實○又案
諸侯皆朝舉魯以見其餘之說陳氏是

六月衛侯鄭自楚復歸于衛衛元咺出奔晉左氏
元或訴

於衛侯曰立叔武矣其子角從公公使殺之咺不廢
命奉夷叔以入守六月晉人復衛侯甯武子與衛人
盟于宛濮衛侯先期入叔武將沐聞公至喜捉髮走
出前驅公子歆犬射而殺之公知其無罪也枕之股
而哭之殺歆犬穀梁也歸楚有奉焉爾復者復中國
元咺出奔晉穀梁也歸楚有奉焉爾復者復中國
也疏以鄭非大罪故出奔不名惡胡氏衛侯失國出
其藉楚之力故入名以表失國胡氏衛侯失國出
歸得國何以名殺叔武也叔武者衛侯之弟也晉文
公有憾於衛侯而不釋怨於是逐衛侯立叔武叔武
辭立而他人立則恐衛侯之不得反也於是已立乎
其位治反衛侯衛侯得反而疑其弟則曰叔武篡我
元咺爭之曰叔武無罪衛侯不信其言終殺叔武是
不念鞠子哀而以爭國為心亂民彝滅天理其為罪
大矣此其所以名也元咺由是走之晉而訟其君然
衛侯初歸則稱復再歸何以不稱復乎春秋立法甚

嚴而待人以恕鄭之初歸雖殺武叔既名之矣猶意其或出於誤而能革也是以稱復及其不再歸又殺元咺及公子瑕則終以爭國為心長惡不悛無自艾之意矣是以不稱復其曰歸于衛者易辭也諸侯嗣故稱復者繼之也不稱復張氏掇也成公殺叔武雖者絕之也而國非其國矣

可謂大弗友元咺以臣訟君可乎然亦晉侯惡衛之心有以召之也

案胡氏所引叔武之事本公羊與左氏所載小異由左氏言之則衛侯為誤殺由公羊言之則衛侯為忌殺然衛侯之內忌信讒始於殺角之時今之殺叔武乃其本心但誣罪於前驅以告諸侯耳此公羊所以為實錄也○又案大夫出奔而歸多言所自蓋因其力也傳例曰有奉焉爾是也諸侯出奔受執而歸入者入皆不言所自獨曹伯書自京師衛侯鄭書自楚穀梁以為

有奉夫衛已告絕於楚楚已不得志於中國衛
安能藉其力乎何氏以為自楚為天子諱也其
說尤乖舛胡氏於自京師得之於此條則畧而
不解惟陳氏曰君歸不言自君而言自者危不
得歸也是故晉文實復衛侯而曰自楚危自楚
也晉厲實歸曹伯而曰自京師危自京師也此
說亦似未盡大抵書自楚者其亦觀
其所主而榮辱成敗見之意也歟

陳侯款卒 ○秋杞伯姬來公子遂如齊張氏

杞伯姬來而入杞之

怨釋公子遂如齊而取穀之憾解中國貴於伯
權之立如此此可以觀邵子所謂功之首者矣

案公子遂如齊七始此年文
二文十七十八宣元二宣八

冬公會晉侯齊侯宋公蔡侯鄭伯陳子莒子邾子秦人

于溫天王狩于河陽

穀梁無齊左氏是會于溫討不服也

以諸侯見且使王狩于河陽言非其地也且明德也注晉侯

書曰天王狩于河陽言非其地也且明德也注晉侯

大合諸侯而欲尊事天子以為名義自嫌強大不敢

朝周喻王出狩因得盡羣臣之禮皆譎而不正之事

為其辭逆而意順故經以王狩為辭隱其召君之闕

欲以明晉之功德此違凡變例以起大義危疑之理

故特稱仲尼以明公羊天子也魯子曰溫近而踐土

之不服衛許也明公羊天子也魯子曰溫近而踐土

遠穀梁之行也為若將守而遇諸侯之朝也為天王

諱也水北為陽山胡氏天王狩于河陽尊周而全晉

南為陽溫河陽也胡氏天王狩于河陽尊周而全晉

召君名義之罪人也其可訓乎若原其自嫌之心嘉

其尊王之義則請王之狩忠亦至焉故夫子特書狩

于河陽所謂原情為制以誠變禮者也夫踐土之會
王實自往非晉罪也故為王諱而足矣溫之會晉則
有罪而其情順也故既為王諱之陳氏溫召王以諸
又為晉解之於以見春秋忠恕也
侯見則先狩而後會曷為先書會後書狩春秋不以天
會是以天子與斯會也先書會後書狩春秋不以天
子與斯會
之詞也

案莊二十二年王巡虢守不書則王狩之非狩
審矣非狩而曰狩為尊者諱也春秋書狩四而
此非講武之狩蓋假巡狩之禮以為詞也正義
曰言天王自來狩獵于河陽之地天子諸侯田
獵皆於封內不越國而取諸人河陽實以屬晉
非王狩所故言非其地若此則又以狩為田狩
之名○又案諸侯在喪稱子葵丘宋襄稱子自
在本班此年陳共公稱子降在鄭下召陵陳懷

公稱子又在鄭上杜曰傳無義例蓋主會者次之非褒貶也○又案秦與中國會始此

壬申公朝于王所

杜氏曰壬申十月十日有日而無月史闕文

公羊

其日何錄乎內

也注危錄內再失禮將為有義者所惡不月穀梁朝而日者自是諸侯不繫天子若日不繫月
廟禮也於外非禮也獨公朝與諸侯盡朝也其日以其再致天子故謹而日之主善以內目惡以外言曰公朝逆辭也而尊天子會于溫言小諸侯溫河北地以河陽言之大天子也日繫於月月繫於時壬申公朝于王所其不月失其所繫也以爲晉文公之行事爲已慎矣注以臣召君慎倒上下日不繫月猶諸侯不宗陳氏朝踐土不繫日此繫日何見先狩而後朝天子陳氏也王嘗至踐土而不言狩則王意也可以但言朝至溫非王意也不可以但言朝故書曰天王狩于河陽壬申公朝于王所然則雖諱而諸侯致天

子之實見矣齊桓盟王人不盟宰周公殊會世子晉文實致天子而朝之故曰晉文譎而不正

案有日無月杜氏說是公穀鑿本不可取以他傳無解故錄之穀梁謹日之說得之

晉人執衛侯歸之于京師衛元咺自晉復歸于衛左氏

衛侯與元咺訟甯武子為輔鍼莊子為坐士榮為大士衛侯不勝殺士榮則鍼莊子謂甯俞忠而免之執

衛侯歸之于京師寘諸深室甯子職公羊歸之于者納橐饘焉元咺歸于衛立公子瑕

歸于者罪未定也罪未定則何以得為伯討歸之于者執之于天子之側者也罪定不定已可知矣歸于

者非執之于天子之側者也罪定不定未可知也衛侯之罪何殺叔武也何以不書為叔武諱也春秋為

賢者諱何賢乎叔武讓國也此晉侯也其稱人何貶曷為貶衛之禍文公為之也文公逐衛侯而立叔武

使人兄弟相疑放乎殺母弟者文公為之也自者何
有力焉者也此執其君其言自何為叔武爭也餘見
前胡氏穀梁歸之于者緩詞也斷在京師也自晉
所引氏諸侯不專殺為臣執君故衛侯不名而元咺稱復
大夫不世其稱復絕之也自晉者晉有奉焉歸者易
辭以文公為之主故其歸無難而方伯之罪亦明矣
是以執而稱人不得為伯討也

案此歸之于京師與成十五年晉侯執曹伯歸
于京師書法不同公羊曰歸之于者罪已定矣
歸于者罪未定也穀曰歸之于者緩詞也歸于
者急詞也胡氏曰歸之于者執不以正之詞也
程子曰歸于者順易之詞歸之于者強歸之詞
正義曰此無義例史異辭爾趙子曰歸于與歸

之于其義一也或傳寫衍縮耳諸說皆異疑趙
子及正義頗得之又就上四說論則公穀之言
本可通蓋考之傳晉文執衛侯先自定其罪然
後歸之京師假王命以治之則所謂罪已定所
謂緩詞皆合晉厲執曹伯不敢自定其罪即歸
京師使王治之則所謂罪未定所謂急詞亦合
但其下文所解乃反不通若穀梁移成十五年
斷在晉侯說於此條下而移此條斷在京師說
於成十五年則兩通矣○又紫大夫歸入稱復
者三元咺宋魚石晉欒盈皆伉辭也皆無歸道
也

諸侯遂圍許

左傳丁丑日十月十五日左氏

注會溫諸侯也許比再

穀梁

遂繼事也

胡氏

諸侯比再會天子再至皆朝于王所而許獨不會以其不臣也故諸侯圍

許案古者巡狩諸侯各朝于方岳今法天子行幸三百里內亦皆問起居許距河陽踐土近矣而可以不繼事之辭也

案許自盟幽後又十四年而鄭人侵許於是許常從中國桓公沒諸侯從楚不獨許自子人九行成而鄭從晉叔武受盟而衛從晉陳侯如會而陳亦從晉前日從楚以執宋圍宋者皆改乘轅而北向獨許負固不至蓋許在鄭南密邇於楚服楚之威令久矣是以久圍而不變也以藁爾之許合十一國之衆逾時越歲而不能成功雖曰義舉亦以見威力之及人淺矣許之甘心從夷其亦有懲于江黃也歟○又案桓公之編書諸侯遂救許文公之編書諸侯遂圍許皆義舉也然圍齊致伐圍許致圍春秋其亦與晉文之討貳而不與晉文之過暴歟

曹伯襄復歸于曹遂會諸侯圍許左氏之晉侯有疾曹伯

史使曰以曹為解齊桓公為會而封異姓今君為會而滅同姓曹叔振鐸文昭也先君唐叔武之穆也

且合諸侯而滅兄弟非禮也與衛偕命而不與偕復非信也同罪異罰非刑也公說復曹伯遂會諸侯圍

許穀梁復通王命也遂繼事也注中國猶國中也胡

氏曹伯襄何以名其歸之道非所以歸也晉侯有疾使其豎侯孺貨筮史曰以曹為解晉侯恐於是反

曹伯夫以賂得國而春秋名之以比於失地滅同姓之

罪以此知聖人嚴於義利之別以正性命之理其說

行而天下定矣張氏魯叔孫豹見執於晉樂王鮒欲

豈曰小補之哉張氏求貨為請叔孫却而弗與叔孫

姑見執於晉魯使申豐以貨如晉叔孫留而不出大

夫之知義者猶恥以貨賂苟免况諸侯乎曹伯襄之

名以枉已者不足正
人失君國之道也

附錄左氏

晉侯作三行以禦狄荀林父將中行屠擊將右行先蔑將左行

案晉已有三軍增置三行辟天子六軍之名也

二十有九年春介葛盧來左氏

介葛盧來朝舍于昌衍之上公在會饋之芻米

禮也注介東夷國也葛盧介君名也不稱朝不
見公且不能行朝禮雖不見公國賓禮之故書公羊

夷狄之君也不言穀梁微國之君未爵者陳氏
朝不能乎朝也穀梁也其曰來卑也陳氏夷介東

未通於上國一歲再至其意將安在乎
故亟書之介人侵蕭譏有以來之也

公至自圍許張氏

其至以圍許久役而不能服也

案踐土不書至而圍許
書至文公之伯事怠矣

夏六月會王人晉人宋人齊人陳人蔡人秦人盟于翟

泉公羊上有公字翟作狄杜翟泉左氏公會王子虎晉洛陽城內大倉西南池水也

齊國歸父陳轅濤塗秦小子憖盟于翟泉尋踐土之

盟且謀伐鄭也卿不書罪之也在禮卿不會公侯會

伯子男可也注晉侯始伯翼戴天子諸侯輯睦王室無虞而王子虎下盟列國以瀆大典諸侯大夫上敵

公侯虧禮傷教故貶諸大夫諱公與盟大國之卿當

小國之君故可以會伯子男諸卿之見貶亦兼有此

闕故傳公羊注文公圍許不能服自知威信不行故重發之公羊復上假王人以會諸侯年老志衰不能

自致故諸侯亦使微者會胡氏案左氏則皆列國之

之月者惡伯功之廢於是胡氏貴大夫與王子而公

與會也其貶而稱人諱不書公何也翟泉近在洛陽
王城之內而王子虎於此下與列國盟是謂上替諸
侯大夫入天子之境雖貴曰士而於此上盟王子虎
是謂下陵而無君之心著矣故以為大惡諱公而不
書諸國之卿貶稱人而王子陳氏晉初以大夫盟王
亦與焉者此正其本之意也陳氏晉也向也踐土之
役王子虎不言涖盟也今以大夫盟王子文公之志
荒矣大夫之交政於是始文公為之也不斥言王子
虎為尊尊諱也以其人王子虎不可不偏人諸侯
之大夫以其偏人諸侯之大夫不可不沒公也

案晉文公三大盟會本皆非禮踐土于溫致天
王翟泉盟王子其視齊桓之尊王人不敢盟世
子周公者大不侔矣然春秋推心之法則踐土
王實自勞非晉之罪于溫召王事雖逆而情順
故皆諱之以存其尊王之名若翟泉則羣然最
聚於王都之側上與王子虎軟血以約言既非

踐土子虎蒞盟之。比又無于溫。懷自嫵之心。春秋不得不重貶之。以顯其慢王之實矣。蓋至此方結正晉文之罪。是亦望其始而不足其終也。其三會不書。公說已見莊十六年。○又案晉侯受命鄭伯。傅王踐土于溫。二會咸在鄭。無叛晉之狀。而此會謀伐鄭者。得非文公過鄭。鄭不禮焉。前日之會。黽勉以大義受之。而內懷宿恨。尚未釋歟。外傳載文公誅觀狀。以伐鄭及其裨鄭人。以名寶行。成公弗許。欲得叔詹而烹之。以詹一言而止。則伐鄭者。報怨未已也。春秋重貶以瞿泉之盟。而明年書秦晉圍鄭。豈無意哉。

秋大雨雹左氏

為災也

穀梁

注雹者陰脅陽臣侵君之象。陽氣之在水雨則溫熱陰氣

薄而脅之不相入轉而成雹

胡氏

正蒙曰凡陰氣凝聚陽在內者不得出則奮擊而為雷霆陽在

外者不得入則周旋不舍而為風和而散則為雪霜
雨露不和而散則為戾氣曠陰陰常散緩受交於陽
則風雨調寒暑正電者戾氣也陰脅陽臣侵君之象
當是時僖公即位日久季氏世卿公子遂專權政在
大夫萌於此矣

案經書大雨雹三此年
及昭三年冬四年春

冬介葛盧來左氏

葛盧以未見公故復來朝禮之加燕好介

其音云問

公羊

勉注進稱名能慕中國朝賢君明當扶

之而信

進陳氏

春秋以一字為褒貶於介乎何費詞也春秋

也三月癸酉大雨雹震電庚辰大雨雪正月己
卯烝五月丁丑烝將著其末不可不詳其始也

案春秋兩書介來以其事言則逮人慕中國當從何氏以其實言則逮人窺中國當從陳氏要之陳氏說是春秋不以例之鄉犁來而以例之白狄則非予介可知矣

三十年春王正月○夏狄侵齊左氏

晉人侵鄭以觀其可攻與否狄間晉

之有鄭虞也

胡氏

晉文公若移圉鄭之師以伐狄則

夏狄侵齊胡氏方伯之職脩矣上書狄侵齊下書

圍鄭此直書其事而義自見者也

秋衛殺其大夫元咺及公子瑕左氏

晉侯使醫衍酖衛侯甯俞貨醫使薄

其酖不死公為之請納玉於王與晉侯皆十穀王許之乃釋衛侯衛侯使賂周欵治厘曰苟能納我吾使

爾為卿周治殺元咺及子適子儀公入祀先君周治既服將命周欵遇疾而死治厘辭卿注瑕立經年未

會諸侯故公羊衛侯未至其稱國以殺何道殺也注
不稱君於道路遇而殺之坐之與至國同
穀梁稱國以殺罪累上也以是為訟君也衛侯在外
其累上之辭言之何也待其殺而後入也公
子瑕累也以胡氏元咺訟君為惡君歸則已出君出
尊及卑也胡氏則已歸無人臣之禮信有罪矣則
稱國以殺而不去其官何也春秋之法躬自厚而薄
責於人君子之道譬諸射失諸正鵠反求諸已衛侯
之躬無乃有闕盍亦省德而內自訟乎夫稱國以殺
者君與大臣專殺之也衛侯在外其稱國以殺何也
穀梁子曰待其殺而後入也待其殺而後入是志乎
殺咺瑕者也兵莫憐於志鏌鉞為下衛侯未入而稱
國以殺此春秋誅意之效也然則大臣何與焉從君
於惡而不能正故并罪之也公子瑕未聞有罪而殺
之何也元咺立以為君故衛侯忌而殺之也然不與
衛剽同者是瑕能拒咺辭其位而不立也不與陳佗與

同者是瑕能守節不為國人之所惡也故經以公子冠瑕而稱及見瑕無罪事起元咺以咺之故延及於殺而衛侯忌克專殺濫刑之惡著矣

衛侯鄭歸于衛公羊

此殺其大夫其言歸何歸惡乎元咺也元咺之事君也君出則已入

君入則已出胡氏衛侯出奔于楚則不名見執于晉以為不臣也胡氏則不名今既歸國復有其土地矣何以反名之乎不名者責晉文公之以小怨妨大德名之者罪衛侯鄭之以枝害戕本支衛侯始歸而殺叔武再歸而及公子瑕故再書其名以為後戒

案諸侯執不書歸僖十九年滕子成九年鄭伯襄十六年莒子邾子十九年邾子之類是也惟伯晉文之執曹衛書歸陳氏曰危不得歸也又晉厲之執曹伯書歸胡氏曰言天王之釋有罪也

○又案衛侯歸之于京師而書歸于衛譏不在王室也曹伯亦歸于京師而書歸自京師譏不在也

晉人秦人圍鄭左氏

晉侯秦伯圍鄭以其無禮於晉且貳於楚也晉軍函陵秦軍汜南佚

之狐言於鄭伯曰國危矣若使燭之武見秦君師必退公從之夜縋而出見秦伯曰秦晉圍鄭鄭既亡矣若亡鄭而有益於君敢以煩執事越國以鄙遠君知其難也焉用亡鄭以陪鄰鄰之厚君之薄也鄙遠君鄭以為東道主行李之往來其乏困君亦無所害且君嘗為晉君賜矣許君焦瑕朝濟而夕設版焉君之所知也夫晉何厭之有既東封鄭又欲肆其西封若不闕秦將焉取之闕秦以利晉惟君圖之秦伯說與鄭人盟使杞子逢孫楊孫戍之乃還子犯請擊之公曰不可微夫人之力不及此吾其還也亦去之初

鄭公子蘭奔晉從於晉侯伐鄭請無與圍鄭許之使
待命于東鄭石甲父侯宣多逆以為大子以求成于
晉晉人許之胡氏案左氏則書人者貶之也孟子曰
注蘭穆公也胡氏有人於此待我以橫逆則君子必
自反也今鄭伯之于晉公子特不能厚將迎贈送之
禮而未嘗以橫逆加之也坐此見圍為列國者不亦
難乎故晉侯秦伯貶稱人者晉文以私怨勤民動衆
圍人之國秦伯惟利為向背從燭之武之言不以義
舉也於是二國結釁連
兵暴骨原野自此始矣

案秦晉之爭始此夫秦以非子之餘踐岐豐之
地春秋所書大抵皆與晉兵爭之迹爾自穆公
釋韓之憾而從晉於城濮之功於是盟于溫于
翟泉偕役于齊鄭戮力同心未始有隙由燭之
武一語而秦輔晉之心變矣文公既卒而殽戰
啓釁厥後彭衙之戰令狐之戰河曲之戰秦之

伐晉者六晉之伐秦亦六興數十年報復之師
更四君而未已蓋至襄公十一年戰櫟十三年
十三國之伐然後交伐之文始絕於經然則有
穆公之賢而其所就僅止此豈非貪利忘義之
哉失哉

介人侵蕭公羊

注稱人者侵中國故退張氏
次年來魯而之疏來朝稱名今稱人

蕭求援而後舉兵也
與荆人秦術之聘同

案介侵蕭三傳皆無事迹胡
氏亦畧之惟陳氏張氏說是

冬天王使宰周公來聘公子遂如京師遂如晉左氏

王使

周公閱來聘饗有昌歠白黑形鹽辭曰國君文足昭
也武可畏也則有備物之饗以象其德薦五味羞嘉

穀鹽虎形以獻其功吾何以堪之公羊大夫無遂事
東門襄仲將聘于周遂初聘于晉公羊此其言遂何
公不得為政爾注時見使如京師而橫穀梁以尊遂
生事矯君命聘晉故疾其驕蹇自專
言不敢叛京師也注鄭曰遂固受命如京師如晉尊
周不敢使並命使若公子遂自往然即云公子遂如
京師如晉是同周于諸胡氏大夫出疆有以二事出
侯叛而不尊天子也
事者其書皆曰遂公子遂如周及晉與祭公自魯逆
王后皆所謂以二事出者也公子結往媵而及齊宋
盟則專繼事者也是非得失則存乎其事矣冢宰上
兼三公其職任為至重而來聘于魯天王之禮意莫
厚焉魯侯既不朝京師而使公子遂往又以二事出
夷周室於列國此大不恭之罪履霜堅冰之漸春秋
之所誅而不以聽者也則何以無貶乎有
不待貶絕而罪惡見者不貶絕以見罪惡

案胡氏二事出之說本穀梁及杜氏若公羊則專罪公子遂之專二說未知孰是而穀梁精透足見書法此條與公如京師遂會伐秦皆是王事書遂此本以二事出春秋則以如晉為遂事不敢以王事同於伯事也彼本以伐秦出春秋則以伐秦為遂事不欲先伯事而後王事也○又案經書內大夫如晉二十八年始於此公子遂三此年三十一年文六年也內大夫如京七年亦始於此年公子遂文元年叔孫得臣八年公孫教九年得臣宣九年仲孫蔑襄二十四叔孫豹昭二十

二叔鞅也

三十有一年春取濟西田左氏

取濟西田分曹地也使臧文仲往宿於重館重

館人告曰晉新得諸侯必親其共不速行將無及也從之分曹地自洮以南東傳于濟盡曹地也注晉分

曹田以賜魯公羊惡乎取之取之曹也曷為不言取
故不係曹
曹者則其言取之曹何晉侯執曹伯班其所取侵地
于諸侯也晉侯執曹伯班其所取侵地于諸侯則何
諱乎取同姓胡氏謂之取何也春秋之法不以亂易
亂

案濟西田左氏穀梁皆以為曹田公羊以為曹
所侵魯之故田胡氏從公羊濟西田首末三見
於經此年取之曹宣元年以賂齊宣十年齊人
以歸我○又案經書田十桓元年假許田宣元
齊取濟西田十年齊歸濟西田成二年取汶陽
田八年韓穿來言汶陽襄十九年取邾田定十
年齊歸鄆謹龜陰田哀二年取鄆東田沂西田
及此年也不繫國者吾故田也非吾田則係國

邾田是也。邾東沂西田不繫國者，乘上，文伐邾，文也。

公子遂如晉，左氏

拜曹田也。

夏四月，卜郊，不從，乃免牲。猶三望。左氏

非禮也。猶三望，亦非禮也。

禮，不卜，常祀而卜，其牲日牛，卜日白牡，牲成而卜郊。上怠慢也。望，郊之細也。不郊，亦無望可也。注：免，猶縱也。三望，分野之星，國中山川皆因郊祀望而祭之。魯廢郊，天而脩其小祀，故曰猶猶者，可止之辭。疏：降婁魯分其祭，奎公羊也。四卜非禮也。求吉之道，三禘嘗婁之神也。公羊也。四卜非禮也。求吉之道，三禘嘗不卜郊，何以卜郊？非禮也。魯郊非禮也。魯郊何以非禮？天子祭天，諸侯祭土，天子有方望之事，無所不通。諸侯山川有不在其封內者，不祭。曷為或言免牲，或言免牛，免牲禮也，免牛非禮也。傷者曰牛，三望者

何望祭也祭大山河海山川有能潤于百里者天子
秩而祭之觸石而出膚寸而合不崇朝而徧雨乎天
下者大山爾河海潤于千里猶者何通可以已也何
以書譏不郊而望祭也注方望謂郊時望祭四方羣
神日月星辰風伯雨師五岳穀梁夏四月不時也四
瀆及餘山川凡三十六所穀梁卜非禮也免牲者
為之緇衣熏裳有司立端奉送至于南郊免牛亦然
乃者亡乎人之詞也猶者可以已之詞也注三望海
岱淮海岱及淮惟徐州徐魯地全曰牲傷曰牛亡乎
人若曰無賢人也譏僖公不共致天變郊者天人相
與交接之意不言郊胡氏記禮者曰祭帝于郊所以
天者不敢斥尊也胡氏定天位也禮行于郊而百
神受職焉魯諸侯何以有郊成王以周公有大勲勞
於天下命魯公世世祀周公以天子之禮樂是故魯
君孟春乘大輅載弧韞旂十有二旒日月之章祀帝
于郊配以后稷天子之禮也以人臣而用天子之禮

可乎是成王過賜而伯禽受之非也諸侯祭天其僭
極矣聖人於春秋欲削而不存則無以志其失悉書
之則歲事之常有不勝書者故因禮之變而書于策
或以卜或以時或以望或以牲或以牛於變之中又
有變焉者悉書其事而謂言偃曰魯之郊也契也非禮也
周公其衰矣杞之郊也禹也宋之郊也契也是天子
之事守也言杞宋夏商之後統承先王脩其禮物非
列國之比也是故天子祭天地諸侯祭社稷祝嘏莫
敢易其常古易則亂名犯分人道之大經拂矣古者
大事決於卜故洪範稽疑獨以龜為主卜而不從則
不郊矣故免牲望祭也有虞氏受終而望因於類巡
狩而望因於柴皆天子之事也今魯不郊而望故特
書曰猶猶者可以己之辭其言三望者天子有方望
無所不通諸侯非名山大川在其封內者則不祭魯
得用重禮視王室則殺故望止於三比諸侯則隆故
河海雖不在其封內而亦祭然非諸侯之所得為也

陳氏之諸侯而有郊禘東遷之僭禮也魯之郊禘惠公請

焉張氏於劉原父曰昔者魯惠公使宰讓請郊廟之禮

始為墨翟之學使成王已賜魯郊則惠公奚請惠公

之請殆由平王以下乎諸儒多據明堂位及禮運劉氏說未知所出姑存之以俟參考魯郊非禮故不曰大事於上帝而曰郊

案經書魯郊九此年夏四月四卜郊不從乃免

牲猶三望成十年四月五卜郊不從乃不郊襄

七年四月三卜郊不從乃免牲十一年四月四

卜郊不從乃不郊此以卜不定也宣三年正月

郊牛之口傷改卜牛牛死乃不郊猶三望成七

年正月饗鼠食郊牛角改卜牛饗鼠又食其角

乃免牛夏不郊猶三望定十五年正月饗鼠食

郊牛牛死改卜牛夏五月辛亥郊哀元年正月

饕餮食郊牛角改卜牛夏四月辛巳郊此以牛
傷也成十七年九月辛丑用郊此專以時失也
○又案魯之有郊何也程子曰成王以周公
大勲勞賜魯重祭也此主禮記明堂位及禮運
等說三傳皆同獨臨江劉氏以為成王周之盛
王未必過賜故以為魯之有郊惠公請之引史
記曰魯惠公使宰讓請郊廟之禮於天子天子
使史角往公止之其後實為墨翟之學於魯陳
氏用其說歷舉東遷以來秦襄祠西時齊桓欲
封禪晉郊鯨等事證謂此皆東遷之僭禮且又
引定四年祝鮒舉成王命魯之詞不及郊祀等
辨難甚至但史角事不知所出而祝鮒之言亦
有備物典冊語則又未敢以此而盡棄禮記諸
書也○魯郊之用孟春何也家語孔子曰郊之
祭也迎長日之至也故周之始郊以日至於
啟蟄之月則又祈穀于上帝此二者天子之禮

也魯無冬至大郊之事特以孟春祈穀為郊啖
子曰孟春周之三月也故以二月卜三月上辛
不吉則卜中辛又不吉則卜下辛三卜禮也穀
梁子哀元年傳曰郊自正月至于三月郊之時
也以十二月上下辛卜正月上辛不從則以正
下辛卜二月上辛不從則以二月下辛卜三月
上辛如不從則不郊矣夏四月郊不時也五月
郊不時也又曰夏之始可以承春以秋之末承
春之始蓋不可矣九月用郊不宜用也三卜禮
也四卜非禮也五卜強也左氏疏曰啓蟄以節
氣論若四月而春分未過尚可郊也以家語及
明堂左氏論之則孟春為是穀梁傳卜三月非
矣但四月猶近之五月九月則大不時也近世
鈍齋王氏曰魯不敢用冬至大郊而止用孟春
祈穀之郊又避天子所用建寅之月故春秋所
書魯郊多在四月乃建卯春分之後未有於周

正建子之月及建寅啓蟄之月書郊者此說亦有見○郊之用卜何也古者大事皆決於卜公羊以爲天子之郊常事則不卜魯郊非常是以卜之卜止於三吉則爲凶則已左氏以爲常禮不卜止卜牲與日案周祀五帝前期卜日帥執事而卜日則天子亦卜也但所卜者不過卜日與牲而已春秋所書亦卜日與牲也左氏譏其卜祭者非矣○郊之用辛日何也穀注曰郊必用上辛者取其新潔莫先也○郊牛之傷皆在正月者何也穀梁曰以六月上甲始庀牲十月上甲始繫牲十一月十二月牲雖有變不道也待正月然後言牲之變言至郊時然後言其變重其妨郊也陸氏曰禮養牲必在滌三月故自周之十一月下旬而養牲至二月中旬而牲成故得以二月下旬而卜三月上辛也陸氏說是蓋十一月養牲則正月有變所宜書矣陸氏正月有

變而改卜尤無害於三月四月之郊也穀梁說則與在滌三月不合○牲而或曰牛或曰牲何也左曰牛卜曰牲公曰傷者曰牛穀曰全曰牲傷曰牛未成牲亦曰牛僖三十一年乃免牲襄七年乃免牲皆在四月且在四卜三卜之後則左氏卜日說是也宣三年成七年定十五年哀元年書牛皆以傷在正月則公穀傷曰牛未牲曰牛亦是也○不郊而或言免牲或言免牛何也凡不郊皆卜免牲卜免牲吉則免之不吉則否書免牲則見其不郊矣僖三十一年襄七年止書免牲是也若不郊而不行免牲之禮則不書免牲成十年襄十一年止書不郊是也若牛死則無可免矣宣二年牛死乃不郊是也獨成七年既書免牛又書不郊何也穀梁曰免牲不曰不郊免牛亦然此經復書不郊者蓋以僖公免牲與三望同時故畧去不郊之文今此春

免牛而夏三望故須書不郊以見之也免牲者
為之緇衣纁裳奉之南郊天位歸之于陽也已
傷曰牛而尚卜免之何也嘗置之上帝矣卜而
後免之不敢專也卜之不去則如何不免安置
之繫而待庀牲然後左右之○改卜之禮何也
凡養牲必二一祀上帝一祀后稷帝牛月變則
改卜稷牛以代之而別以他牛為稷牛也禮曰
帝牛在滌三月稷牛惟具若卜稷牛不吉及
養稷牛又死則不郊○三望之異同何也說左
氏者以為分野星及封內山川說公羊者以為
泰山河海說穀梁者以為海岱淮據三家皆不
以三望為非禮止譏其舍郊而望此已失之況
望乃祭山川之名何得以為分野之星若以三
望為魯之封內魯所得祭則常事必書何哉胡
氏取公羊說以為泰山河海泰山魯所得祀河
海非魯封內故不當祀然既曰魯視王室則殺

故望止於三而又用朱長文之說曰禮天子有四望魯惟得祭泰山餘三望僭禮故書之則是魯祭泰山之外猶有三望之祭也與前說稍不合矣要之後說是○三望書猶何也猶者可已之詞三傳皆合但諸傳皆以大禮之不舉為恨胡氏則獨以僭禮之未盡除為譏則詞雖同而意異矣胡氏說是○春秋書猶三猶三望猶朝于廟猶繹也三望與繹譏其可已而不已之詞也朝廟幸其不可已而不已之詞也蘇氏曰如此而猶如此者甚之詞也不如此而猶如此者幸之詞也此說發明二猶字甚佳但以猶三望為幸之詞則失之矣

秋七月○冬杞伯姬來求婦穀梁也非正胡氏逆婦而書

者以公自為主失其班列書也杞伯姬敵矣其來求婦曷為亦書見婦人不可預國事也

狄圍衛十有二月衛遷于帝丘左氏

卜曰三百年衛成公夢康叔曰相奪

予享公命祀相甯武子不可曰鬼神非胡氏帝丘東其族類不歆其祀祀鄆何事請改祀命胡氏郡濮陽顓頊之虛亦衛地也狄嘗迫逐黎侯黎侯寓於衛而衛不能脩方伯連帥之職戎嘗伐凡伯于楚丘而衛不能救王臣之患其後遂為狄人所滅東徙渡河矣齊桓公攘戎狄而封之而衛國忘亡今又為狄所圍其遷于帝丘辟狄難也而中國衰微夷狄強盛衛侯不能自強於政治晉文無却四夷安諸夏之功莫不見張氏自狄入衛後不敢加兵于衛者齊桓之力也矣張氏及衛文忘齊之大德於是狄人始假義以伐衛晉文興而稍息至是又圍衛者亦晉文惡衛之深有以啓之也

附錄左氏

是年晉蒐于清原作五軍以禦狄趙衰為卿

案此蓋罷三行而更為上下新軍也

三十有二年春王正月○夏四月己丑鄭伯捷卒○衛

人侵狄秋衛人及狄盟左氏

狄有亂衛人侵狄秋胡氏請平狄衛人及狄盟

其不地者盟於狄也再書衛人而稱及者所以罪衛也盟會中國諸侯之禮衰世之事已非春秋所貴况與屢遭狄患即其廬帳刑牲歃血以要之哉

附錄左氏

是年春楚鬬章請平于晉晉陽處父報之晉楚始通

冬十有二月己卯晉侯重耳卒

子襄公繼伯左氏晉文公卒

沃出絳柙有聲如牛卜偃使大夫拜曰君命大事將有西師過軼我擊之必大捷焉胡氏案左氏載

秦納晉文公其事甚詳而春秋不書者以爲不告也徐邈曰諸侯有朝聘之禮赴告之命所以敦交好通憂虞若鄰國相望而情志否隔存亡禍福不以相關則他國之史無由得書魯政雖陵典刑猶在史策所錄不失常法其文足證仲尼脩之事仍本史有可損而不能益也

案晉文以二十四年入國至二十八年城濮始主伯迄三十二年凡五年李氏曰晉有二文之業蓋文侯文公也書錄文侯之命捍王于艱錫以秬鬯爲東周賢侯春秋詳文公之伯蓋文侯家法也文公之興其事易於齊桓固有自來矣然文公既入國而事之不載於經者凡四年雖以納王之懿功削而不見至二十八年一簡之中乃五摯晉侯不以爲繁何哉蓋自武公以支伐宗并吞專立讀無衣之詩雖晉之臣民不能自安也春秋爲是黜晉不書文公奔而復國內

無所承工何所稟經復畧之勤王固為大美然
特以求諸侯之利心而為之豈真知有君臣之
義哉至二十八年晉楚之事乃關夷夏之盛衰
非係一國之得失春秋抑楚之深故與晉之亟
則晉亦不為無績於中國矣此其與桓公並稱
歟大抵桓文雖並稱而文固非桓匹也桓公二
十餘年蓄威養晦始能問罪於楚文公一駕而
城濮之功多於召陵桓公屢盟屢會遲迴晚歲
始會宰周公文公再合而溫之事敏乎葵丘桓
公終身與諸侯會鄆失魯盟幽失衛首止失鄭
葵丘失陳文公三會而大侯小伯莫有不至其
得諸侯又盛乎桓公而曰文非桓匹何也文公
之功多於桓公者罪亦多於桓公也事速就乎
桓公者義尤壞乎桓公者也名盛乎桓公者實
衰乎桓公者也春秋不以功蓋罪不以事掩義
不以名誣實此其非桓匹歟桓公得江黃而不

用於伐楚文公謂非致秦則不可與楚爭楚抑而秦興矣此桓公之不肯為也桓公會則不遇三川盟則不加王人文公會畿內則伉矣盟子虎則悖矣此桓公之不敢為也桓公寧不得鄭不納子華懼其獎臣抑君不可以訓文公為元咺執君則三綱五常於是廢矣此又桓公不忍為也夫子正譎之辨獨不深自著明哉

三十有三年春王二月秦人入滑左氏杞子自鄭使告于秦曰鄭人使

我掌其北門之管若潛師以來國可得也穆公訪諸蹇叔蹇叔曰勞師以襲遠非所聞也師勞力竭遠主備之勤而無所必有悖心公辭焉召孟明西乞白乙使出師蹇叔哭之曰孟子吾見師之出而不見其入也春秦師過周北門左右免胄而下超乘者三百乘王孫滿曰秦師輕而無禮必敗及滑鄭商人弦高遇

之以乘韋先牛十二犒師且使遽告于鄭鄭穆公使視客館則束載厲兵秣馬矣使皇武子辭焉杞子奔齊逢孫楊孫奔宋孟明曰鄭有備矣不可冀也攻之不克圍之不繼吾其還也滅滑而還注滅而書入不能有其地也

齊侯使國歸父來聘左氏

齊國子來聘自郊勞至於贈賄禮成而加以敏臧文仲

言於公曰國子為政齊猶有禮君其朝焉臣聞之服於有禮社稷之衛也

夏四月辛巳晉人及姜戎敗秦于殽

左氏穀梁經作秦師左氏原

軫曰秦違蹇叔而以貪勤民天奉我也奉不可失敵不可縱必伐秦師藥枝曰未報秦施而伐其師其為死君乎先軫曰秦不哀吾喪而伐吾同姓秦則無禮何施之為一日縱敵數世之患也謀及子孫可謂死

君乎遂發命遽興姜戎子墨衰經敗秦師于殽獲百里孟明視西乞術白乙丙以歸遂墨以葬文公文嬴請三帥公許之先軫朝問秦囚公曰夫人請之吾舍之矣先軫怒曰武夫力而拘諸原婦人暫而免諸國墮軍實而長寇讎亡無日矣不顧而唾公使陽處父追之及諸河則在舟中矣釋左驂以公命贈孟明曰明稽首曰三年將拜君賜秦伯素服郊次鄉師而哭曰孤違蹇叔以辱二三子孤之罪也大夫何罪且吾不以一青公羊其謂之秦何夷狄之也曷為夷狄之掩大德公羊秦伯將襲鄭百里子與蹇叔子諫曰千里而襲人未有不亡者也秦伯怒曰若爾之年者宰上之木拱矣爾曷知師出百里子與蹇叔子送其子而戒之曰爾即死必於殽之巖巖是文王之所辟風雨者也吾將尸爾焉然而晉人與姜戎要之殽而擊之匹馬隻輪無反者其言及姜戎何微也稱人先軫也或曰襄公親之親之則其稱人何君在乎殯而

用師危不得葬也詐戰穀梁不言戰而言敗何也狄
不日此何以日盡也詐戰穀梁秦也秦越千里之險入
虛國進不能守退敗其師徒亂人子女之教無男女
之別秦之為狄自殺之戰始也晉人者晉子也其曰
人何也微之也何為微之胡氏案書序秦穆公伐鄭
不正其釋殯而主乎戰也胡氏晉襄公帥師敗諸穀
而經書晉人敗秦于殽是皆仲尼親筆其詞何以異
乎書序專取穆公悔過自誓之言止於勸善其詞恕
春秋備書秦晉無道用兵之失無於懲惡其法嚴此
所以異也晉襄親將絀不稱君者俯逼葬期忘親背
惠墨衰經而即戎其惡甚矣視秦猶狄其罪云何客
人之館而謀其主因人之信已而逞其詐利人之危
而襲其國越人之境而不哀其喪叛盟失信以貪勤
民而棄其師狄道也夫杞子先軫之謀偷見一時之
利微幸其成自以為功者也二君皆過聽焉而貪其
利是使為人臣子者皆懷利以事其君父君臣父子

去仁義懷利以相與利之所在則從之矣何有於君父率是而行其流失有不可問而大倫滅矣春秋人晉子而狄秦所以立人道存天理也

案穀戰公穀皆以為狄秦張氏曰公羊經不書師蓋必有所傳故啖趙劉氏胡氏皆從之穀梁止以敗秦師為狄之蓋援中國與夷狄不言戰之例則恐非書法其曰秦之為狄自穀始則亦必有所傳也趙子以及字為衍文蓋據晉師白狄伐秦秦人白狄伐晉之例並不言及故也然此初見于經則以殊戎之文示之亦謹始之法趙子說未必然

癸巳葬晉文公狄侵齊左氏

狄侵齊因晉喪也

公伐邾取訾婁秋公子遂帥師伐邾

訾婁公羊作叢婁穀作樓左氏

公伐邾取訾婁以報升陁之役邾人不設備胡氏此
秋襄仲復伐邾注魯亦因晉喪以陵小國
不勝忿慾報怨貪得恃強陵弱不義之兵也直書其
事而罪自見或曰取須句訾婁有為為之也伐邾至
于再三念母勤矣夫念母者必當止乎禮義平王不
撫其民而遠屯戍于母家詩人刺之夫子錄焉僖公
以成風之有功于已也越禮以尊其身違義以
報其怨殘民動衆取人之邑曾是以為可乎

晉人敗狄于箕左氏

獲白狄子先軫免胄入狄師死焉缺

反自箕襄公以三命命先且居將中軍以再命命先
茅之縣賞胥臣曰舉卻缺子之功也以一命命卻缺
為卿復與之冀

冬十月公如齊十有二月公至自齊左氏

朝且弔有張

氏間晉而虐邾所以因齊聘而朝之以自托也

案晉襄初立伯事未定秦之窺鄭齊之聘魯皆有志於爭伯也晉襄惟外患之是憂而置齊魯之交於度外故不逾年而伯事復盛焉亦善於繼承者矣春秋書敗秦敗狄如齊伐許於一年之間其晉伯絕續之會三強睥睨之秋歟

乙巳公薨于小寢

十一月十二日經作十二月誤

左氏

即安也

胡氏

路寢治事

之所小寢燕息之地也君終不於路寢則非正矣

隕霜不殺草李梅實

隕公左氏

注書時失也周十一月今九月霜當微而重重

而不能殺草所以為災

公羊

何以書記異也何異爾不時也注周之十二月夏之十月也易中孚

記曰陰假陽威之應也早賈霜而不殺萬物至當賈霜之時根生之物復榮不死斯陽假與陰威陰威列索故陽自賈霜而反不能殺也穀梁未可殺而殺舉此祿去公室政在公子遂之應穀梁重也可殺而不殺舉輕也注京房易傳曰君假與臣權則賈霜不殺草從叛者茲謂不明厥妖木冬實重菽也輕草也輕者不死則重胡氏哀公問於仲尼曰春秋記隕霜不者不死可知胡氏殺草何為記之也曰此言可殺也夫宜殺而不殺則李梅冬實天失其道草木猶干犯之而况君乎是故以天道言四時失其序則其施必悖無以統萬象矣以君道言五刑失其用則其權必喪無以服萬民矣哀公欲去三桓張公室問社於宰我宰我對以使民戰栗蓋勸之斷也仲尼則曰成事不說既往不咎其自與哀公言乃以為可殺何也在聖人則能處變而不失其常在賢者則必有小貞吉大貞凶之戒矣其論隕霜不殺草則李梅冬實蓋除

惡於微慮患
於早之意

案隕霜二此年不殺草穀梁所謂舉
輕也定元年殺穀梁所謂舉重也

晉人陳人鄭人伐許左氏

討其貳於楚也楚子工侵陳
蔡陳蔡成遂伐鄭晉陽處父

侵蔡子工救之與晉師夾泚而軍陽子使謂子工曰
吾聞文不犯順武不違敵子若欲戰則吾退舍子濟
而陳遲速惟命不然紆我老師費財亦無益也子工
退陽子宣言曰楚師遁矣遂歸楚師亦歸大子商臣
諧子上曰受晉賂而辟之楚
之恥也罪莫大焉王殺子工


案僖公在位三十三年實為魯之賢君當其初
歲內用公子友臧文仲外則堅事齊桓故能去
慶父之姦蠹使魯國既危而復安自十七年以
前除從齊會無征伐外魯事之見經者甚少觀

詩之所頌如務農重穀則勤於為民也春秋享
祀則謹於奉先也立闕宮復泮宮克淮夷牧圉
野雖一時夸大之辭有過其實然禮樂政事之
脩明君臣上下之協洽槩可想矣但盟醴未返
遽有邾師之敗葵丘稍怠遽肆陽穀之樂則公
豈真能以禮信輔齊耶厥後宋襄繼起雖其伯
事有不足以得魯然與其南向以從楚孰若尊
獎先代協贊姻隣以為中國之重乃乞師蠻荆
導之以伐齊宋其失大矣蓋自十六年季友卒
後臧文仲之竊位公子遂之專權如滅項會楚
之失備見於經向非晉文肇造一戰勝楚則中
原左衽之禍僖公何以逭其責哉先儒曰棄夏
盟而即楚則有從狄之非先晉室而後周則無
敬君之節須句之功不足掩升陘之辱取穀之
師不足洗至鄆之恥此僖之不得全為賢侯也
况乎季友受費而季孫氏始公孫茲帥師而叔

孫氏始公孫敖帥師而孟孫氏始三桓之基皆
肇於僖公之編則僖公亦魯國功之首罪之魁
歟也



春秋諸傳會通卷十一



覆校官檢討臣季學錦

校對官檢討臣郭寅

謄錄監生臣劉書

欽定四庫全書叢要

經部

春秋會通卷十二

三



欽定四庫全書薈要卷一千六百三十七

經部

春秋諸傳會通卷十二

元李廉撰

文公

名興謚法慈惠愛民曰文在位十八年

左氏

注文公僖公之子夫人聲姜所

生僖公薨文公立

周襄王二十六年

元年春王正月公即位左氏

注先君未葬而公即位不可曠

年無君也釋例曰遭喪繼立者每新年正月必改元正位百官以序故國史書即位於策以表之文公成公先君未葬而書即位因三正之始明繼嗣之正表朝儀以固百姓之心此乃國君明分制之大禮譬周



康王麻冕黼裳以行事
穀梁繼正即位者告
事畢然後乃喪服也
胡氏廟臨羣臣

也國君嗣世定於初喪必逾年然後改元書即位者
緣始終之義一年不二君故不改於柩前定位之初
緣臣民之心不可曠年無君故不待於三年畢喪之
後逾年春正月乃謹始之時禮之中也孔子曰君薨
百官總已以聽於冢宰三年則告廟臨羣臣固有攝
行之禮矣案商書稱大甲元祀伊尹祠于先王則攝
而告廟之證也百官總已聽於冢宰則攝而臨羣臣
之證也至三祀十有二月伊尹以冕服奉嗣王則免
喪從吉之證也康王時成王方崩猶未成服故用
黼裳入受顧命或以康王釋服離次而即吉誤矣
案魯自隱至文六君惟文公承國於先君得書
即位故胡氏於此始發告廟臨羣臣之禮彼隱
莊閔僖非不行此典
也但春秋削之耳

二月癸亥日有食之

杜氏月一日不書朔官失之

○天王使叔服來

會葬左氏

王使內史叔服來會葬注叔氏服字諸侯喪天子使大夫會葬禮也

公羊穀梁

同左胡氏

凡崩薨卒葬人道始終之大變不以得禮為常事而不書其或失禮而害於王法之

甚者聖人則有削而不存以示義者矣

夏四月丁巳葬我君僖公○天王使毛伯來錫公命左

氏

王使毛伯衛來錫公命注毛國伯爵衛字諸侯為王卿士者諸侯即位天子賜以命圭合瑞為信僖

十一年王賜晉侯命亦其比也

公羊

錫者何賜也命者何加我服也注文公新即位功未足施而錫

之非穀梁

禮有受命無來錫命錫命非正也

胡氏

諸侯終喪入見則有錫歲時來朝則

有錫能敵王所愾則有錫黼冕圭璧因其終喪入見而錫之者也禮所謂喪畢以士服見天子已見賜之黼冕圭璧然後歸是已車馬衮黼因其歲朝而錫之者也詩所謂君子來朝何錫予之雖無予之路車乘馬又何予之玄衮及黼是已彤弓旅矢因其敵愾獻功而錫之者也詩所謂彤弓彤矢受言藏之我有嘉賓中心貺之鐘鼓既設一朝享之是已今文公繼世喪制未畢非初見繼朝而獻功也何為來錫命乎故穀梁子曰來錫命非正也

案王錫命說已見莊元年此條據杜氏以為諸侯初即位天子錫以命圭如侯執信圭之類公羊以為賜以命服以晉惠初立王賜之命而晉侯受玉情證之則杜氏得之晉武公以請命于王而詩人有子之衣安且吉之詞證之則公羊亦得之故胡氏取禮經黼冕圭璧之說然後其

義始
備

晉侯伐衛左氏

晉文公之季年諸侯朝晉衛成公不朝使孔達侵鄭伐綿訾及匡晉襄既祥使

告于諸侯而伐衛及南陽先且居曰效尤禍也請君朝王臣從師晉侯朝王于溫先且居胥臣伐衛五月晉師圍戚取之獲孫昭子

叔孫得臣如京師

叔牙之孫

左氏

注拜賜命

公羊

注不為喪聘書者為職貢天子

不以喪廢故不譏也張氏

高郵孫氏曰文公即位未嘗請命天子使大夫來錫命公受命矣又不自

朝而使得臣往其不臣可知矣

衛人伐晉左氏

衛人使告于陳陳共公曰更伐之我辭之衛孔達帥師伐晉君子以為古古者越

國而謀注合古之道而失事伯之禮
故國失其邑身見執辱貶孔達稱人

案春秋與國伐伯者三衛人伐晉齊侯伐
衛遂伐晉齊侯衛侯伐晉皆有關於衛

秋公孫教會晉侯于戚左氏

秋晉侯疆戚田故公孫教會之注晉取衛田正其疆

界禮卿不會公侯而春秋魯大夫皆不貶者體例已
舉故據用魯史成文而已疏例已貶于翟泉之盟

案內大夫特會外諸侯五教會晉侯于戚行父
會齊侯于陽穀歸父會齊侯于穀歸父會楚子
于宋叔弓會楚子于陳也此為大夫特會諸侯
之始而胡氏特發傳于歸父之下不知所謂

冬十月丁未楚世子商臣弑其君頤

頤公穀皆作髡

左氏

初楚子將

以商臣為太子訪諸令尹子上子上曰君之齒未也
而又多愛黜乃亂也楚國之舉恒在少者且是人也

螽目而豺聲忍人也不可立也弗聽既又欲立王子
職而黜商臣商臣聞之而未察告其師潘崇崇曰享
江芊而勿敬也從之江芊怒曰役夫宜君王之欲殺
汝而立職也告崇曰信矣冬十月以宮甲圍成王王
縊穆王立胡氏書世子弑君者有父之親有君之尊而至
於弑逆此天理大變人情所深駭春秋詳
書其事欲以起問者察所由示懲戒也唐世子弘受
左氏春秋至此廢書嘆曰經籍聖人垂訓何書此邪
郭瑜對曰春秋義存褒貶以善惡為勸誡故商臣千
載而惡名不滅弘曰非惟口不可道故亦耳不忍聞
願受他書瑜請讀禮世子從之嗚呼聖人大訓不明
於後世皆腐儒學經不知其義者之罪耳若語之曰
為人君父而不通春秋之義必陷篡弑誅死之罪聖人書此
子而不通春秋之義必陷篡弑誅死之罪聖人書此
者使天下後世察於人倫知所以為君臣父子之道
而免于首惡之名誅死之罪也則世子弘而聞此必

將懷然畏懼知春秋之不可不學矣學于春秋必明
臣子之義不至於奏請拂旨而不見醜矣傳者案也經
者斷也考于傳之所載可以見其所由致之漸豈隱
乎嫡妾必正而楚子多愛立子必長而楚國之舉常
在少者養世子不可不慎也而使潘崇為之師侍膳
問安世子職也而多置宮甲降而不憾憾而能眈者
鮮矣乃欲黜兄而立其弟謀及婦人宜其敗也而使
江芊知其情是以不仁處其身而以不孝處其子也
其及宜矣楚顧僭王憑陵中國戰勝諸侯毒被天下
然昧于君臣父子之道禍發蕭牆而不之覺也不善
之積豈可掩哉君不君則臣不臣父不父則子不子
春秋書世子弑君者推本所由而著其首惡為萬世
之大戒也然則商臣無貶矣曰弑父
與君之賊其惡猶待于貶而後著乎

公孫敖如齊左氏

穆伯如齊始聘焉禮也凡君即位卿
出並聘踐修舊好要結外援好事鄰

國以衛社稷忠信卑讓之道也忠德之正也信德之固也卑讓德之基也注傳因此發凡以明諸侯諒闇則國事皆用吉禮

公羊

注書者譏喪娶吉凶不相干

案此條左氏例施之他年聘則可杜氏以為諒闇用吉禮者大非故趙子去其禮也二字以明年納幣之書考之則公羊注說得之

附錄左氏

公孫敖聞叔服能相人也見其二子焉曰穀也食子難也收子穀也豐下必有

後于魯國此左氏于是閏三月非禮也先王之正見孟氏之興左氏時也履端于始舉正於中歸餘於終履端於始序則不愆舉正于中民則不惑歸餘于終事則不悖

二年春王二月甲子晉侯及秦師戰于彭衙秦師敗績

彭衙秦地

左氏

穀之役晉人既歸孟明秦伯曰孤實貪以禍夫子夫子何罪復使為政春秦孟明視帥師

伐晉晉侯禦之先且居將中軍及秦師戰于彭衙秦師敗績晉人謂秦拜賜之師秦伯猶用孟明孟明增

修德政重施于民趙成子言于諸大夫曰胡氏戰而秦師又至將必辟之懼而增德不可當也

胡氏

言及

主乎是戰者也夫敵加于已不得已而起者謂之應兵爭恨小故不忍忿怒者謂之忿兵案左氏秦孟明帥師伐晉報穀之役此所謂忿兵疑罪之在秦也而以晉侯主之何哉處已息爭之道遠怨之方也然則敵加于已縱其侵暴將不得應乎曰敵加于已而已有罪焉引咎責躬服其罪則可矣已則無罪而不義見加諭之以詞命猶不得免焉亦告于天子方伯可也若遽然興師而與戰是謂以桀攻桀何愈乎故以晉侯為主者處已息爭之道寡怨之方王者之事也

丁丑作僖公主左氏

哭而祔祔而作主非禮也凡君薨卒

禘於廟又曰丁丑作僖公主書不時也注主者殷以
柁周以栗諸侯既葬反虞則卒哭以新死者之神祔
之於祖尸柁已遠神形又不可得而見孝子思慕故
造木主立几筵焉特用喪禮祭祀於寢不同之於宗
廟新主既特祀於寢則宗廟四時蒸嘗自如舊三年
喪畢致新死者之主以進于廟廟之遠主當遷入祧
於是乃大祭于大廟以審定昭穆謂公羊為主也主者
之禘今過葬十月始作主故曰不時公羊主也主者
易用虞主用桑練主用栗用栗者藏主也何以書譏不時也穀梁吉主於練作僖
公主譏胡氏作主者造木主也既葬而反虞虞主用
其後也胡氏桑期年而練祭練主用栗用栗者藏主
也何以書僖公薨至是十有五月然後作主慢而不
敬甚矣夫慢而不敬積惡之原也以爲無傷而不去

至於積惡而不可
揜所以謹之也

案作主之說三傳畧同先儒多用公羊公注曰
練主當以十三月是也但公羊下文譏久喪而
後不能之事殊可怪注者又謂文公欲服喪三
十六月此無据之言也故不取○又案公注主
狀正方穿中央達四方天子長尺二寸諸侯長
一尺期年易栗主則埋虞主于兩階之間桑猶
喪也栗謹敬貌也穀注主蓋神之所馮依桑主
不文吉主皆刻而謚之蓋雖為練作之主終入
廟以辨昭穆也祭畢則藏之西壁坎中穀又曰
作主壞廟有時日壞廟之道易檐可也改塗可
也注作主在十三月壞廟在三年喪終主入廟
則易檐以示有所加功左氏唯言祔而作主主
一而已非虞練再
作稍與公穀異

三月乙巳及晉處父盟左氏

晉晉人以公不朝來討公如

恥之書曰及晉處父盟以厭之也適晉不書諱之也
注處父為晉正卿不能匡君以禮而親與公盟故貶
其族族去則非卿故以微人常稱公羊何以不氏諱
為耦以直厭不直不地者盟晉都公羊與大夫盟也
注陽處父救江書氏諱去氏者使若得其君如經言
邾婁儀父矣日者起公盟也微者盟不日如晉不書
不致者深穀梁不言公處父伉也為公諱也何以知
諱之也其與公盟以其日也何以不言公之
如晉所恥也出胡氏及處父盟者公也其不地于晉
不書反不致也胡氏也諱不書公者抑大夫之伉不
使與公為敵正君臣之分也適晉不書反國不致為
公諱恥存臣子之禮也凡此類筆削魯史之舊文衆
矣

案處父之仇與高偃之仇一也處父去氏而高偃存族者彼于防而此如晉也何氏曰親就其國恥不得其君故使若得其君也○又案處父係國而去氏荀庚良夫等係氏而去國者此兼罪晉侯之失彼止罪大夫之專也

附錄

陳氏

陳氏

凡諱國惡恥在公則但書其事不書公者恒辭也諱在其事則但書

公不書其事公會晉侯于黑壤為公不與盟故不書盟公如晉為止公送葬故不書葬甚諱之也是故諱有愛君之誼焉必譏不及君而後諱舍是無諱道矣故曰諱莫如深也

夏六月公孫敖會宋公陳侯鄭伯晉士穀盟于垂隴

垂隴

鄭地公穀作垂欽

左氏

公未至六月穆伯會諸侯及晉司空士穀盟于垂隴晉討衛故也書士穀堪其

事也陳侯為衛請成于晉執孔達以說

公羊

臣注盟不日者欲共盟誅商雖不能誅猶為疾惡故

也褒與

穀梁

內大夫可

陳氏

晉遂以大夫盟諸侯也

信辭也

始故書大夫專盟自士穀也士穀非卿也特書之見
晉之卑諸侯也然則士穀主是盟也曷為序士穀於
諸侯之下春秋不以大夫主盟也翟泉貶此何以不
貶貶不于其甚則于事端餘實錄而已矣是故書士
穀自書士穀而後凡役書大夫桓文之伯也會盟有
大夫則但書人必世子也則得次小國之君自垂隴
主士穀新城主趙盾而後大夫與諸侯序於是戚之
盟書齊國佐沙隨之會書宋華元甚者無伯而君與
大夫並列

於會矣

案內大夫出盟諸侯自柔始繼而公子結及齊
宋又繼而公孫教會三國矣杜氏以為卿不會

公侯例已舉于翟泉故魯大夫皆不貶從此例也陳氏以為貶柔以正其始餘實錄也二說皆可通穀梁說非晉以大夫主諸侯亦始于翟泉故重貶之今士穀與新城趙盾雖書名氏而猶列諸侯之下者晉以大夫主諸侯而春秋亦以諸侯先大夫也陳氏得之左氏與士穀之說非何氏誅商臣事亦無据。又案齊以不朝責鄭而執詹晉以不朝責衛而執孔達其事相類春秋皆以不責之

自十有二月不雨至于秋七月左氏

注周七月今五月不雨足為災不書

旱五穀猶有收也

公羊

記異也大旱以災書此亦旱也曷為以異書大旱之日短而云災故以災

書此不雨之日長而無災故以異書也穀梁歷時而注此祿去公室政在公子遂之所致也

文不憂雨也不憂旱也胡氏書不雨至于秋七月而不雨者無志乎民也胡氏至于秋七月不雨者蓋後言不雨則是冀雨之詞非文公意也夫書不雨至于秋七月而止即八月嘗雨矣然而不書八月雨者見文公無意於雨不以民事繫憂樂也其急于政事可知而魯衰自此始矣

案文公編不雨三此年及十年十三年例同

八月丁卯大事于大廟躋僖公左氏

逆祀也於是夏父弗忌為宗伯尊僖

公且明見曰吾見新鬼大故鬼小先大後小順也躋聖賢明也明順禮也君子以為失禮禮無不順祀國之大事也而逆之可謂禮乎子雖齊聖不先食父食久矣故禹不先鯀湯不先契文武不先不密宋祖帝乙鄭祖厲王猶上祖也是以魯頌曰春秋匪解享祀不忒皇皇后帝皇祖后稷君子曰禮謂其后稷親而先

帝也詩曰問我諸姑遂及伯姊君子曰禮謂其姊親而先姑也仲尼曰臧文仲不仁者三不知者三下展禽廢六關妾織蒲三不仁也作虛器縱逆祀祀爰居三不知也注大事禘也躋升也僖公閔公庶兄繼閔而立廟坐宜在閔下今公羊大事者何大禘也大禘升在閔上故書而譏之何毀廟之主陳于大祖未毀廟之主皆升合食於大祖五年而再殷祭躋者何升也何言乎升僖公譏何譏爾逆祀也其逆祀穀梁大事者何大是事也著裕奈何先禘而後祖也嘗裕祭者毀廟之主陳于大祖未毀廟之主皆升合食于大祖躋升也先禘而後祖也逆祀也逆祀則是無昭穆也無昭穆則是無祖也無祖則是無天也故曰文無天無天者是無天而行也君子不以親親害尊尊此春秋之義也疏著裕嘗者著明是胡氏有事者時祭大事禘也合羣廟祫嘗之祭也胡氏之主食於大廟升僖於閔之上

也閔僖二公親則兄弟分則君臣以為逆祀者兄弟之不先君臣禮也君子不以親親害尊尊故左氏曰祀國之大事也而逆之可乎子雖齊聖不先父食久矣公羊則曰其逆祀先禰而後祖也穀梁則曰逆祀則是無昭穆也無昭穆則是無祖也閔僖非祖禰而謂之祖禰者臣子一例也夫有天下者事七世諸侯五世說禮者曰世指父子非兄弟也然三傳同以閔公為祖而臣子一例是以僖公父視閔公為禮而父死子繼兄終弟及名號雖不同其為世一矣

案古者戎祀皆國之大事季氏將有事于顓臾此以兵事為有事也天子有事於文武此以祭祀為有事也故春秋書大禘為大事書禴祠蒸嘗為有事此年大事禘也宣八年有事禴也昭十五年有事蒸也此皆於祭無譏故不書祭名其郊禘大雩皆書祭名者祭之僭也蒸嘗有書

祭名者祭之失也此年大事之為禘公穀皆同杜氏以為禘者非也○又案禘者象生有合族之義列昭穆齒尊卑諸侯之大祭也其禮大祖東向昭南向穆北向父為昭子為穆孫從王父坐也祭畢則復還其廟公穀皆得之其閔僖父子之說左公穀胡氏皆以僖繼閔而立猶子之繼父故傳以昭穆祖父為喻固無可疑矣范甯不從其說乃以祖為莊親為僖謂文公以僖居莊之上楊士勛辨之已是但左氏正義曰父子異昭穆兄弟同昭穆閔僖本同為穆但閔當在僖上今升僖于閔故云逆祀二公位次之逆非昭穆亂也若兄弟相代即異昭穆設令兄弟四人皆立為君則祖父之廟即已從毀矣理必不然故杜氏只以為位次之逆不以為昭穆之異胡氏辨世指父子之義恐未至○又案定八年從祀先公左氏以為復閔僖之位胡氏不從

冬晉人宋人陳人鄭人伐秦左氏

晉先且居宋公子成陳轅選鄭公子歸生

伐秦取汪及彭衙而還以報彭衙之役卿不書為穆公故尊秦也謂之崇德注秦穆悔過終用孟明故貶

四國大夫胡氏案左氏皆國卿也其貶而稱人者晉以尊秦伯

興此役結怨勤民是全不務德專欲力爭而報復之無已也以致濟河焚舟之師故特貶而稱人

氏曷為不序大夫將猶稱人也自士穀專盟書大夫自陽處父專將書大夫是故春秋之始大夫將恒

稱人由救鄭之後大夫始貶稱人矣

案此條左氏尊秦之義非經意但據其說則此貶四國之卿以尊秦襄八年邢丘貶諸侯之卿

以尊晉其事相類胡氏說本程子其貶晉固是但自入春秋已來至此除魯書大夫帥師外外

兵非君將者皆書人如隱五年邾鄭伐宋桓十四年宋以四國伐鄭齊桓之伯伐宋伐鄭伐鄭伐英氏晉襄以三國伐許與夫明年五國之伐沈皆未有書大夫名氏者則陳氏之考據不為見無

公子遂如齊納幣左氏

襄仲如齊納幣禮也凡君即位好舅甥修昏姻娶元妃以奉案

盛孝也考禮之始也

公羊

納幣不書此何以書譏喪娶也娶在三年之外則何譏乎喪娶三年之內

不圖昏吉禘于莊公譏然則曷為不於祭焉譏三年之恩疾矣非虛加之也以人心為皆有之娶者大吉

也非常吉也其為吉者主於已以穀梁

注喪制未畢而納幣非禮

胡氏

昏姻常事不書書納幣者喪未終而圖昏也夫娶在三年之外則何譏乎春秋論事莫重乎志

志敬而節具與之知禮志和而音雅與之知樂志哀而居約與之知喪非虛加之也重志之謂也此皆使人私慾不行閑邪復禮之意

案喪娶之譏公穀胡氏說同左氏以為禮而又發即位娶妃之凡例此大悖謬不經杜氏遷就其說乃移上僖公之薨於十一月而以此時納幣在十二月又解即位為除凶之即位皆徇左氏之過也故陳氏曰左氏凡例不可取杜說尤悖趙子曰昏禮不當使公子此亦一說

三年春王正月叔孫得臣會晉人宋人陳人衛人鄭人

伐沈沈潰

沈姬姓國

左氏

莊叔會諸侯之師伐沈以其服於楚也沈潰凡民逃其上曰潰在上

曰逃釋例曰衆保於城城保於德言上能以德附衆以功庇下民信其德恃其固故能交相依懷以衛社

稷苟無固志盈城之衆一朝而散如積
冰之敗故曰潰潰者衆散流遁之詞也
胡氏案左氏人將非命卿也沈在汝南
平輿縣北未嘗與中國會盟而南服于
楚師入其境而民人逃散雖非義舉比
於報復私怨之兵則有間矣故其詞無
褒貶凡此類欲示後世用師者知權而
本之以正也

夏五月王子虎卒

左氏王叔文公卒來赴弔如同盟禮也注不書爵者天王赴也翟泉

嘗同盟疏畿內之臣不得外交諸侯其臣不敢赴
魯必天子為之赴赴以王子為親不復言其爵也公

羊

天子之大夫也外大夫不卒此何以卒胡氏王子
新使乎我也注子虎即叔服也穀梁同胡氏虎不

書爵譏之也天子內臣無外交或曰禮稱情而為之
節文者也叔服新使乎我則宜有恩禮矣仲尼脫驂
於舊館雖卒叔服可也夫脫驂於舊館惡夫涕之無
從而為之者非禮之經也天子內臣無外交而以新

使乎我加恩禮焉是以私情害公義失輕重之權矣

案左氏注王子虎大宰文公王卿士也內史叔服王之大夫也後十四年星孛之變又載叔服之言則分明兩人矣啖子陳氏亦以公穀為非不知胡氏何据且胡氏於星孛之下又引叔服之言則亦不以左氏為非矣不知何不照應如此

秦人伐晉左氏

秦伯伐晉濟河焚州取王官及郊晉人不出遂自茅津濟封穀尸而還遂伯西

戎用孟明也注晉人恥不出以微者告

胡氏

案左氏秦伯伐晉其稱人何也聖人作易以懲忿窒

慾為損卦之象其辭曰損德之修也春秋諸侯之知德者鮮矣穆公初聽杞子之請違蹇叔之言其名為貪兵是慾而不能窒也及敗於穀歸作秦誓庶幾能改將窒其慾矣復起彭衙之師報穀函之役其名為

憤兵是忿而不能懲也今又濟河取邲人之稱斯師也何義哉晉人畏秦而不出穆公逞其忿而後悔自是見伐不報始能踐自誓之言矣陳氏此秦伯也曷是故於此貶而稱人備責之也秦之誓孔子有取焉而秦穆之連兵無虛歲君子以為秦之未離乎戎狄也是故自韓原秦不以爵見於經至康公而遂狄之終南蒯葭之作秦非無人也而秦不用誠未離乎戎也

案左氏以此役為秦伯西戎之始且稱其舉人之周與人之壹孟明之不解子桑之知人而胡氏諸說皆以為貶者左氏得其事胡氏論其義也

秋楚人圍江左氏

楚師圍江晉先僕伐楚以救江

案經書人以圍國者十一圍非將卑師少所能辦皆貶辭也

雨螽于宋左氏

隊而死也注自上而隊有似于雨宋人以其死為得天祐喜而來告故書公

羊

記異也為王者之後記異也注螽猶衆也衆死而墜羣臣將爭強相殘賊之象穀梁外災

此何以志曰災甚也茅茨盡矣著於上見於下謂之雨

冬公如晉十有二月己巳公及晉侯盟

此書公如晉之始

左氏

晉人懼其無禮于公也請改盟公如晉及晉侯盟晉侯享公賦菁菁者莪莊叔以公降拜曰小國受命于大國敢不慎儀君貺之以大禮何樂如之抑小國之樂大國之惠也公賦嘉樂

案文公再如晉矣二年以見辱不書故此為書公如晉之始文如晉二此年及十三年成公如

晉四三年四年十年十八年襄公如晉五三年四年八年十二年二十一年昭公如晉二五年

十五年不得入五十二年十二年二十一年二十三年奔而如晉二十八年二十九年定如晉不得入一三年朝而及晉侯盟者三此年十三年襄三年長檣

晉陽處父帥師伐楚以救江

公穀無以字

左氏

晉以江故告于周王叔桓

公晉陽處父伐楚以救江門于方城遇息公子朱而還注桓公不書示威名不親伐子朱伐江之帥也江

兵解故

公羊

此伐楚也其言救江何為諉也其為諉奈何伐楚為救江也注据兩之當先言

救非兩之當重出處父生事當言

穀梁

此伐楚其言救江何也江

遠楚近伐楚

胡氏

以者不以者也救江善矣其書以何楚嘗伐鄭矣齊桓公遠結江黃

合九國之師于召陵然後伐鄭之謀罷又嘗圍宋矣晉文公許復曹衛會四國之師於城濮然後圍宋之

役解今江國小而弱非能與宋鄭比楚人圍之必不待撤四境屯戍守禦之衆與宿衛盡行也當是時楚有覆載不容之罪晉主夏盟宜合諸侯聲罪致討命秦甲出武關齊以東兵畧陳蔡而南處父等軍方城之外楚必震恐而江圍自解矣計不出此乃獨遣一軍遠攻強國豈能濟乎故書伐楚以救江言救江雖善而所以救之者非其道陳氏晉大夫書帥師於是矣此春秋紀用兵之法也陳氏始自是恒書大夫貶而後人之

四年春公至自晉○夏逆婦姜于齊左氏

卿不行非禮也君子是以

知出姜之不

公羊

略之也高子曰娶乎大夫者略之也

穀梁

其曰婦姜為其禮成

乎齊也其逆之者誰也親迎而稱婦或者公與何其速婦之也曰公也其不言公何也非成禮于齊也曰

婦有姑之詞也其不言氏何也貶之也胡氏逆皆稱何為貶之也夫人與有貶也注非責也胡氏女以未成婦而女者在父母家之所稱也往逆而稱婦入國不書至何哉此春秋誅意之效也禪制未終思念娶事是不志哀而居約矣方逆也而已成為婦未至也而如在國中原其意而誅之也不稱夫人姜氏者亦與有貶焉婦人不專行何以與有貶父母與有罪也文公不知敬其伉儷違禮而行使國亂子弑齊人不能鑑微知著冒禮而往使其女不允于魯皆失于不正其始之過也夫婦之際人倫之首禮不可不謹也故交貶之以為後鑑

案胡氏專主穀梁趙子亦以為公成禮於齊

狄侵齊○秋楚人滅江左氏

秦伯為之降服出次不舉過數曰同盟滅雖不能救

敢不矜乎陳氏滅不言圍此其書圍何以病晉也張

氏

江之不祀晉襄之無遠謀也

晉侯伐秦左氏

圍祁新城以報王官之後胡氏乃常情耳而穆公濟

河焚舟則貶而稱人秦取王官及郊未至結怨如晉師之甚也襄公又報之於常情過矣而得稱爵何也聖人以常情待晉襄而以王事責秦穆所以異乎襄公忘親背惠大破秦師敗狄伐許怒魯侯之不朝也而以無禮施之是專尚威力先事加人莫知省德而後動也今又報秦不足罪矣穆公初敗於穀悔過自誓增修德政宜若過而知悔悔而能改又有濟河之役則非誓言之意所以備責之也然晉襄見伐而報猶無譏焉秦穆至是見伐而不報善可知矣不譏晉侯所以深善秦伯春秋大改過嘉釋怨王者之事也

故仲尼定書列秦誓於百篇之末以見悔
過能改而不責人雖聖賢誥命不越此矣
張氏晉襄
官之役不報為恥未若商臣之得志於江為
恥之大也比事書之見晉襄之為盟主末矣

案秦穆晉襄五年之
間交兵者五止此

附錄左氏

是年晉歸孔達于衛以為衛之良也衛
侯如晉拜曹伯如晉會正注會受貢賦

之政也傳言襄
公能繼文之業

衛侯使甯俞來聘

公羊正本作甯
速賈氏從之

左氏

甯武子來聘公
與之宴為賦湛

露及彤弓不辭又不答賦使行人私馬對曰臣以為
肄業及之也昔諸侯朝正于王王宴樂之于是乎賦
湛露則天子當陽諸侯用命也諸侯敵王所愾而獻
其功王于是乎賜之彤弓旅矢以覺報宴今陪臣來

繼舊好君辱貶之其
敢干大禮以自取戾

案左氏所記本于經意無與以其
足以見王待諸侯之禮故錄之

冬十有一月壬寅夫人風氏薨左氏

成風薨注僖公母
風姓也赴同祔姑

故稱

胡氏

風氏僖公之母莊公妾也而稱夫人自是
嫡妾亂矣語曰邦君之妻邦人稱之曰君

夫人稱諸異邦曰寡小君蓋敵體之稱也若夫妾媵
則非敵矣其生亦以夫人之名號稱之其沒亦以夫
人之禮卒葬之非所以正其分也以妾媵為夫人徒
欲尊寵其所愛而不虞卑其身以妾母為夫人徒欲
崇貴其所生而不虞賤其父卑其身則失位賤其父
則無本越禮至是不亦悖乎夫禮庶子為君為其母
無服不敢貳尊者也春秋於成風記其卒葬
各以實書不為異詞者謹禮之所由變也

五年春王正月王使榮叔歸舍且賵三月辛亥葬我小

君成風王使召伯來會葬

召伯穀梁作毛伯

左氏

王使榮叔來舍且賵召昭

公來會葬禮也注反哭成喪故曰

胡氏

珠玉曰舍車馬曰賵歸舍

小君召伯天子卿召采地伯爵也

且賵者厚禮妾母也不稱天王者弗克若天也春秋

繫王于天者所履者天位所治者天職也所賞所刑

者天命天討也夫婦人倫之本王法所尤謹者今成

風以妾僭嫡王不能正又使大夫歸舍賵焉而成之

為夫人則王法廢人倫亂矣故不書天以謹之也仲

子雖聘非惠公之敵春秋之初尚以為疑故別為立

宮而羽數特異此雖非禮之正然不祔于姑猶有辨
焉至是成風書葬乃有二夫人祔廟而亂倫易紀無
復辨矣故禮之失自成風始也王臣下聘桓公冢宰
書名示貶而大夫再聘則無譏焉或以為從同同也

或以為同則書重也成風薨王使榮叔歸含且賵既不稱天矣及召伯來會葬又與賵焉何也是將祔之於廟也而致禮于成風盡矣再不敢略也天聖人於此尤謹其戒而不敢略也

案杜氏釋例以為適夫人既死妾母於法得成夫人及榮叔召伯之來皆以為得禮非公穀又譏其兼行舍賵據禮舍賵祿兼同一人安得以此譏之乎又曰不言來者不周事之詞也此皆失之何氏以歸舍為臣子職會葬不及事故失去天此皆拘於母以子貴之說不敢以妾母為譏故不得其說耳胡氏是陸氏曰不言來者承上文成風薨故不言來也胡氏曰不書來請之也

夏公孫敖如晉○秦人入郛

郛今襄陽宜城縣

左氏

初郛叛楚即秦又貳

於楚夏秦

人入都

秋楚人滅六

六廬江六縣今壽州安豐縣

左氏

六人叛楚即東夷楚成大心仲歸帥師滅

六冬楚公子變滅蓼滅文仲聞六與蓼滅曰臯陶庭堅不祀忽諸德之不建民之無援哀哉

冬十月甲申許男業卒

附錄左氏

是年晉趙衰藥枝先且居胥臣皆卒

六年春葬許僖公。夏季孫行父如陳

行父季友孫世本曰季友生仲

無佚無佚生行父季文子也

左氏

臧文仲以陳衛之睦也欲求好於陳夏季文子聘于陳且娶焉

秋季孫行父如晉左氏

季文子將聘于晉使求遭喪之禮以行曰備豫不虞古之善教

也

八月乙亥晉侯驩卒左氏

晉襄公卒靈公少晉人以難故欲立長君趙孟曰立公子

雍好善而長先君愛之且近於秦秦舊好也賈季曰不如立公子樂趙孟使先蔑士會如秦逆公子雍賈季亦使召樂于陳趙孟使殺諸耶注賈季狐偃子狐射姑也

冬十月公子遂如晉葬晉襄公左氏

襄仲如晉葬襄公注昭三年傳曰昔

文襄之伯也其務不煩諸侯君薨大夫弔卿共葬事疏昭三十年傳又曰先王之制諸侯之喪士弔大夫葬送葬

案晉自襄公繼文世主夏盟是時秦穆亦號伯西戎春秋列之夷狄曾不得與邾莒之國以爵

先後况援之伯哉襄起僖三十一年盡文六年
凡七年李氏曰齊孝公不能率齊桓之烈晉襄
能繼晉文之統孝公初宋有抑齊之志襄公初
秦懷駕晉之謀宋啟羸之爭秦尋敵之釁此皆
爭伯之端也孝公不能抗宋而襄公首能挫秦
此晉之所以未失伯則穀之戰春秋亦幸晉有
功矣乃削而人之何哉曰幸之者夷不偏華以
權之未失也削之者喪不興戎以義之不可也
豈得以小功妨大義乎雖然襄公復伯則實始
於此文公之沒三強並興秦雄西陸狄徂北師
楚復強于南苟縱一敵則晉伯去矣襄公夏戰
穀以却秦秋敗箕以翦狄冬伐許以離楚一年
之間三敵悉退亦可謂有伯者之畧此其能繼
文者也苟有伯者之畧則襄公之烈何為僅止
乎此曰外患既息舉動即異伐衛則損威矣會
公孫敖則毀列矣士穀主盟則權散矣處父救

江則謀急矣越一二載事不逮初况能持久乎
是以君子不貴速成而圖全于其終不志小利
而慮患于其遠襄之規模又後于文公甚矣

晉殺其大夫陽處父晉狐射姑出奔狄

射穀作夜

左氏

先是五年

陽處父聘衛甯嬴從之及溫而還其妻問之曰以剛
天為剛德猶不干時况在人乎且華而不實怨之所
聚也六年春晉蒐於夷舍二軍使狐射姑將中軍趙
盾佐之處父至自溫改蒐于董易中軍陽子成季之
屬也故黨於趙氏且謂趙盾能曰使能國之利也是
以上之至是賈季怨陽子之易其班也而知其無援
於晉也九月使續鞠居殺陽處父書曰晉殺其大夫
侵官也十一月晉殺續簡伯賈季奔狄宣子使史駢
送其帑夷之蒐賈季戮史駢史駢之人欲盡殺賈氏
以報焉史駢曰不可前志有之曰敵惠敵怨不在後

嗣忠之公羊

射姑殺則其稱國以殺何君漏言也其漏言奈何君將使射姑將陽處父諫曰

射姑民衆不說不可使將於是廢將處父出射姑入君謂射姑曰陽處父言曰射姑民衆不說不可使將

射姑怒出刺陽處父而走穀梁

稱國以殺罪累上也襄公已葬其以累上之詞言之何也君漏

言也晉將與狄戰使狐夜姑為將軍趙盾佐之陽處父曰不可古者君之使臣也使仁者佐賢者不使賢

者佐仁者今趙盾賢夜姑仁其不可乎襄公曰諾謂夜姑曰吾始使看佐女今女佐盾矣襄公死處父主

竟上事夜姑使人殺之君漏言也故士造辟而胡氏言詭辭而出曰用我則可不用我則無亂其德

公羊子曰稱國以殺何君漏言也易曰不出戶庭無咎何謂也子曰亂之所生則言語以為階君不密則

失臣臣不密則失身幾事不密則害成是以君子慎密而不出也凡書殺者在上則稱君在下則稱氏在

衆則稱人在微者則稱盜君與臣同殺則稱國今殺處父者射姑耳君獨以漏言故亦預殺焉所以為後世戒也或以處父為侵官非歟曰人君用人失當則其國必危凡立於朝者舉當諫君况身為晉國之大傅邪若以為侵官將相大臣非其人百官有司失其職在位者當拱默自全陰聽人主之所為至于顛危而不救則將焉用彼相乎率天下臣子為持祿容身不忠之行以誤朝迷國者必此侵官之說夫

附錄左氏

趙宣子於是始為國政制事典正法罪辟獄刑董逋逃由質要治舊濇本秩禮

續常職出滯淹既成以授大傅陽子大師賈佗使行諸晉國以為常法

閏月不告月猶朝于廟左氏

閏月不告朔非禮也閏以正時時以作事事以厚生

生民之道于是乎在矣不告閏朔棄時政也何以為民

公羊

不告月者何不告朔也曷為不告朔

天無是月也猶者穀梁閏月者附月之餘日也積分
何通可以已也而喪事不數也猶胡氏則曷為不言朔也因月之虧
之為言可以已也盈而置閏是主乎月而有閏也故不言朔而言月占
天時則以星授民事則以節候寒暑之正則以氣百
官修其政于朝庶民服其事於野則主乎是焉耳矣
閏不可廢乎曰迎日推策則有其數轉璣觀衡則有
其象歸奇于扚以象閏數也斗指兩辰之間象也象
數者天理也非人所能為也故以定時成歲者唐典
也以詔王居門終月者周制也班告朔於邦國不以
是為附月之餘而弗之數也猶朝于廟者幸其不已
之詞子貢欲去告朔之餼羊
子曰爾愛其羊我愛其禮

案朱子曰古者天子常以季冬頒來歲十二月
之朔於諸侯諸侯受而藏諸祖廟月朔則以特

羊告廟請而行之張氏曰所謂稟正朔也閏者所以定四時成歲天子以為月而頒之為諸侯而不奉以告是輕正朔而慢時令也公穀以為附月之餘日又曰天子不以告朔此說已非而猶字之義諸傳皆以為可止之詞大率皆譏其舍大政而謹小禮獨胡氏以為幸其不已之詞其說本於蘇氏以我愛其禮證之則此義精矣○又案僖五年傳曰公既視朔後此十六年公四不視朔皆同但告于廟則謂之告朔因以聽治此月之政則謂之視朔

附錄左氏

是年夏秦伯任好卒以子車氏之三子為殉皆秦之良也君子曰秦穆之不為

盟主也宜哉死而棄民

七年春公伐邾三月甲戌取須句遂城郛

句公羊作胸

左氏

公伐邾間晉難也取須句寘文公子焉非禮也注須句魯之封內屬國也僖公反其君之後邾復滅之時邾文公子叛在魯故公使為守須句大夫絕大皞之祀以與鄰國叛臣故曰非禮邾魯邑在下縣南因伐邾之師以城公羊取邑不日此何以日內詞也使若之備邾難也他人然注使若公春伐邾而去他人自以甲戌日取之內再取邑然後甚而日之也今此一取而日故使若他人然所以深諱者扈之盟不見序并為取邑故書遂穀梁不正其再取故謹而者甚其生事困極師衆穀梁日之也遂繼事也

夏四月宋公王臣卒宋人殺其大夫

王穀作壬

左氏

宋成公卒昭公

將去羣公子樂豫曰不可公族公室之枝葉也葛藟猶能庇其本根故君子以為比况國君乎此諺所謂庇焉而縱尋斧者也必不可不聽穆襄之族帥國人以攻公殺公孫固公孫鄭于公宮六卿和公室樂豫

舍司馬以讓公子卬昭公即位而葬書曰宋胡氏書人殺其大夫不稱名衆也且言非其罪也

人者國亂無政非君命而衆人擅殺之也大

夫不名義繫于殺大夫而其名不足紀也

案此條及八年司馬司城之書公羊以為宋三世內娶故三世無大夫此無据不可從穀梁以為稱人以殺誅有罪也亦非左氏以為衆則晉殺三卻鄭盜殺三卿何乃悉書乎故胡氏皆不從陳氏以為宋昭之大夫皆不名故公子卬蕩意諸稱官子哀稱字以為君無道也未知然否

附錄

陳氏

陳氏

春秋有一人之辭焉于晉靈公凡盟

會皆不序諸侯是天下之辭也於魯莊公凡會齊皆書人是一國之辭也於魯桓公凡大夫將皆不言大夫于宋昭公凡大夫皆不名是一人之辭也

戊子晉人及秦人戰於令狐晉先蔑奔秦

蔑公羊作昧蔑下有以師

字

左氏

秦康公送公子雍於晉穆嬴日抱大子以啼于朝曰先君何罪其嗣亦何罪舍嫡嗣不立

而外求君將焉寘此出朝則抱以適趙氏頓首於宣子曰先君奉此子也而屬諸子曰此子也才吾受子之賜不才吾唯子之怨今君雖終言猶在耳而棄之若何宣子與諸大夫皆患穆嬴且畏偁乃背先蔑而立靈公以禦秦師箕鄭居守趙盾將中軍先克佐之荀林父將上軍先蔑將下軍先都佐之及董陰宣子曰我若受秦秦則賓也不受寇也既不受矣而復緩師秦將生心先人有奪人之心軍之善謀也逐寇如追逃軍之善政也潛師夜起戊子敗秦師于令狐先蔑奔秦士會從之先蔑之使也荀林父止之曰夫人

大子猶在而外求君此必不行子以疾辭若何不然將及弗聽注先蔑先還晉晉人始以逆雍出軍卒然

變計立靈公故先蔑仍將下軍穆嬴襄夫人靈公母
趙盾廢嫡而外求君故敗稱人晉諱背先蔑而薄秦
師以戰告不言公羊此偏戰也何以不言師敗胡氏
出在外奔也績敵也注言勝負敵也
程氏以為晉不謝秦秦納不正皆罪也故稱人晉懼
秦之不肯已而擊之是晉人為志乎是戰者也故書
及其貶之如此者使後世臣子慎于廢立之際不可
忽也治亂存亡繫國君之廢立事莫重于此矣而可
以有誤乎奕者舉棊不定不勝陳氏春秋貴誼不貴
其耦况置君而可以不定乎陳氏惠尚治不尚功
託人之孤至于交戰是亦伐喪而已矣是故宋襄立
齊孝公戰于甌貶人之秦康公送晉公子雍戰于令
狐貶人之

案秦晉之交兵又始于此十年有少梁北征之
師十二年有河曲之戰宣元年二年有侵崇之

報伐左氏本末獨詳公穀以先
蔑為逃軍者蓋不知事實耳

狄侵我西鄙左氏

公使告于晉趙宣子使因賈季問鄆舒且讓之鄆舒問賈季曰趙衰趙盾

孰賢對曰衰冬日之日也
盾夏日之日也

秋八月公會諸侯晉大夫盟于扈

扈鄭地

左氏

齊侯宋公衛侯陳侯

鄭伯許男曹伯會晉趙盾盟于扈晉侯立故也公後至故不書所會凡會諸侯不書所會後也後至不書

其國辟不敏也注公後會而及其盟故不具列公侯及卿大夫

公羊

諸侯何以不序大夫何以不名

公失序也失序奈何諸侯不可使與公盟眡晉大夫使與公盟也注以目通指曰眡文公為諸侯所賤薄

不見序故深諱為不可知之詞穀梁

其曰諸侯略之也

注與公羊意同

胡氏

諸侯會

盟于扈為晉侯立故也趙盾內專廢置其君外強諸侯為此盟其不名者見大夫之強諸侯不序見公之不及於會也文公怠情事多廢緩既約晉盟而復後至故隱其不及罪公之不能自強於政治魯自是日益衰

陳氏

垂隴書士穀而序諸侯此何以不序晉始失伯也凡稱諸侯必前目而後凡也非凡

詞者散詞也

案文公之編三會于扈皆止書諸侯左氏以十五年盟扈書諸侯無能為也十七年會扈書諸侯無功也是則總稱諸侯者皆罪諸侯也此總稱諸侯為公後至也諸國皆在公獨後至故諱公罪而歸責于諸侯若言諸侯無功然所以辟公之不敏也趙子曰不書諸侯責公不早赴而自取其恥也胡氏從此公穀說雖小異亦可通於左氏若陳氏則以不序諸侯為不係之伯者

之詞亦有見也。○又案經書扈之盟會七此七年十五年十七年宣九年成十六年昭二十七年及莊二十三年

冬徐伐莒公孫敖如莒涖盟左氏

徐伐莒莒人來請盟穆伯如莒涖盟初穆

伯娶于莒生文伯惠叔又聘於莒莒人辭則為襄仲聘焉至是如莒娶之叔仲惠伯成之使仲舍之公孫敖反穀梁前定之盟不日

附錄左氏

郤缺言于趙宣子曰日衛不睦故取其地今已睦矣可以歸之八年春晉侯使

解揚歸匡戚之田于衛且復致公壻池之封自申至于虎牢之竟傳言趙盾所以能相幼主而盟諸侯

八年春王正月。夏四月。秋八月戊申天王崩。

襄王也僖

九年即位在三
十三年頃王立

冬十月壬午公子遂會晉趙盾盟

于衡雍

衡雍鄭地
月五日

乙酉公子遂會雒戎盟于暴

暴鄭地

左氏

晉人以扈之盟來討襄仲會晉趙孟盟于衡雍
報扈之盟也遂會伊雒之戎書曰公子珍之也

注伊雒戎將伐魯公子遂不及復君故專命與之
盟大夫出境有可以安國家者專之可也珍貴也

梁

疏再稱公子者若下文直言遂恐為繼
事之詞兩名不辨故重言公子以詳之

胡氏

春秋記約

而志詳其書公子遂盟雒戎何詞之贅乎曰聖人謹
華夷之辨所以正名分別內外也雒邑天地之中而
戎入居之逼近甚矣再稱公子各日其會正其
名與地以深別之者內外之辨終不可失也

案內大夫特盟外大夫二公子遂會晉趙盾盟
衡雍季孫行父及晉卻犇盟於扈是也此皆權
臣專行之事而此為造端春秋於翟泉歷貶諸
國大夫而此無譏焉蓋不勝譏矣杜氏貴之之
說非

公孫敖如京師不至而復丙戌奔莒左氏

穆伯如周弔喪不至以幣

奔莒從公羊

其言如京師何遂公意也何以不言出遂在外也

穀梁

不言所至未如

也未如則未復也未如而曰如不廢君命也未復而
曰復不專君命也其如非如也其復非復也唯奔莒
之為信故謹胡氏其書不至而復者言教無入使于
而日之也周之意唯己氏之欲從也夫以志
徇氣肆行淫慾而不能為之帥至於棄
其家國出奔而不顧此天下之大戒也

案陸氏例曰還者事畢復者事未畢之詞公如晉至河乃復仲遂至黃乃復公孫敖不至而復皆事未畢而復也穀梁以復為事畢還為事未畢蓋誤倒其文也張氏曰容其復而復奔見魯之無政刑也又似以復為已到魯之文

蝻公羊

注勢奪於大夫煩擾之應

宋人殺其大夫司馬宋司城來奔左氏

宋襄夫人襄王之姊也昭公不

禮焉夫人因戴氏之族以殺襄公之孫孔叔公孫鍾離及大司馬公子卬皆昭公之黨也司馬握節以死故書以官司城蕩意諸來奔效節于府人而出公以其官逆之皆復之亦書以官皆貴之也注夫人昭公適祖殺梁其以官稱無君之詞也注鄭曰七年殺其母大夫此實無君也今殺其司馬無人君之

德耳無道之甚故稱官以見其輕慢也

胡氏

初昭公欲去羣公子樂豫以為不可舍司馬以讓公

子卬則卬固昭公之黨欲專宋政而昭公固欲以其弟卬自衛也夫司馬掌兵之官不選衆舉賢以素有威望為國人所畏服者使居其任乃欲寵其私昵鮮有不亡者矣公子卬蕩意諸皆以官舉者見主兵者不能其官至于見殺守土者不能其官至于出奔而其君不免失身見弑之禍矣

案宋卿書官者三此司馬司城及司馬華孫也程子曰宋王者後得自命官故獨宋卿書官然其餘不書官而此獨書官者左氏以為不失節啖子謂所謂節者人臣守節之節非符節之節也以二人能守官故書官爾然胡氏不取

春秋諸傳會通卷十二